


MASHINA AMWENGA

 Nakusachila, Mulongo Neville. Akye ke kya—kyakubazhimunatu. Amiwa kechi nafwainwa kwikala kuno leelo ne. Bino, bufuku buno ke bufuku bwa kijilo, kabiji Na—kabiji Najikulanguluka mba Nafwainwa kutanwa kuno lukeelo luno. Kabiji Naichile Mulongo Neville, ne aye waambile mba, “Kyawama, pano, inge ubena kwiya kuno,” waambile mba, “kika kyakubujila kwamba kwi atweba pacheche?”

² Kabiji Nalangulukile mba, kyawama, inge Naishile kuno, kabiji kyakonsheka kubiwa, inge kechi Mbena kusapwila ne, bino nafwainwa kwambapo ku kipwilo pa kakimye kacheche pa byambo abya, mwayukatu, byo Nalanguluka mba byafwainwa kukosensha kipwilo.

³ Twabwelatu kufuma ku—kufuma ku lwendo lwetu lwa kwipaya nyama, balongo ne Amiwa, kuno, kabiji twajinga na kimye kyawama bingi. Atweba—atweba twasata bingi, atweba bonse twaikuta, kabiji—kabiji twaipale nyuma yetu yo twakebelenga. Kabiji—kabiji kafunga wetu ne Amiwa twayuka mba nyama ya, yawama bingi. Nanchi twajinga na diyala wawama bingi. Kabiji Najinga na mbeyala ne ba diyala babiji. Kabiji twabwela.

⁴ Kabiji akye kyafwainwa kwikala kimye akyo Amiwa kyo nafwainwa kwamba pa atwa Tutetesho tutanu na tubiji. Kabiji kechi bajikunengezha kipwilo ne. Kabiji pajipo kintu kimo, kyakaanya, kyalengesha kyokyo. Akyo, Nalanguluka mba muzhi ubena kwitupa jishinda jakosa, mambo akubula mpuzha yabaya bulongo pa kwimika myotoka na mambo a bantu bavula bo . . . ayo kipwilo bo kyafwainwa kulama.

⁵ Tubena kukeba kipwilo kyakatataka kuno, kabiji tuji na lubaji lwa mali atongwelwa kala mwingilo, ne—ne kulengamo kya—kyabaya kipwilo. Bino pakwikala na kupwila, kika, mwayuka byokiji. Ke kintu kyabulanda bingi. Bantu bazhokoloka ku bibumba, monka mu mvula, kabiji—kabiji—kabiji kyatama bingi. Kabiji ne kujimbulula kwafuma ku balunda nami. Waambile mba, “Mulongo Branham, kyamweka nobe abo . . .” Dokotala mulunda nami, waambile mba, “Kyamweka nobe wafwainwa kutambula kifulo kimo.” Waambile mba, “Ndekelaiko mambo, byo bapichijile kwipi nkoji.”

⁶ Manase walondelapo kwi amiwa, waambile mba, “Kika, Naishile kokwa lukeelo lumo pa faivi koloko. Obewa wafwaijlwe kwikala kokwa . . .” Kabiji waambile mba, “Bantu batatwile kubungakana kokwa ku kipwilo, pa faivi koloko mu

lukeelo kelo. Obewa wafwaijilwe kwikala popa pa naini-sate.” Nanchi, monai, kyaikala kyakosa.

⁷ Kabiji tubena kukeba kipwilo kiji na mpuzha, amo bantu bonse po bakonsha kwikala. Kabiji twalanguluka mba tubena kwikala mu moba apelako, twaketekela kyokyo. Amo imo. . . Motwafwainwa kufunjisha Kipwilo pa—pa—pa bibye bintu, abyo bibena kwiya, bintu bya awilwe, bimo bya mu byobyoy, biumbi bya myaka. Kabiji pepi nobe tweti-faivi ne myaka sate, kufuma mu kino kipwilo, bya awilwe, byafwainwa kufikizhiwa. Kabiji pano tuji nakyoy kibena kwiya na kufikizhiwa. Nanchi twafwainwa kwikala babena kupituluka mu bibye bintu, bino kechi tuji na mpuzha yabaya ne. Nanchi lukeelo luno. . .

⁸ Amiwa natuminenga ne bintu bikwabo, keesha, kabiji Njina avula akuuba, mute uno, ne bikwabotu. Kabiji pano Najinga na bantu bamo bakebelenga kwiya, mulunda mwananyike mutemwe, ao uji bingi na lubazhibazhi, wamwingilo mulongo mu mwingilo. Kabiji ne bavula bakwabo, kabiji ne mulongo kufuma ku Norway. Kabiji—kabiji twajinga na misambo ya mepuzho ne mikumbu kunyuma mu kibamba. Kabiji Naambile mba, “Kyawama, pano, tusakufumamo.”

⁹ Kabiji Mulongo Neville waambile mba, “Kyawama, tukaya na kwamba byambo bicheche bya kukosesha Kipwilo pacheche.” Kitans- . . .

¹⁰ Kintu kimo kitanshi kyo Mbena kukeba kwamba. Nanembele bintu bimo papo pa kipepala, namba, inge Naiya ku kipwilo, byo Nakeba kwamba. Kintu kimo kyo Nanembele papo kyajinga kyatala palufu lwa Mulongo Taylor wawama kimye kyo twabujile kuno.

¹¹ Mulongo Taylor waiyanga ku kino kipwilo pa myaka yavula. Atweba bonse twamuyukile, Naketekela kine. Bino inge muno mwakonsha kutanwa benyi, kyajinga yewa mwanamulume wawama ao kimye kyonse wakukumwena kipona, pakwikala. Mulongo Taylor, kimye kyapeleleko kumumona Amiwa, poso Kamumone mwanamulume mwananyike, aye waimene popa pa kibelo pepi nobe fiili nangwa foolo Milungu yapitapo. Aye waambile mba, “Nafwainwa kutemwa kwikala na mabuuku, Mulongo Branham. O nafwainwa kutemwa kupanununa mabuuku.” Nanchi atweba, aye. . .

¹² Kyo Nayuka, wajinga na kikola kya shunga kabiji byobyoy asesukile, kabiji kechi. . .kwakubula kuyuka mba uji na kikola kya shunga ne. Kabiji—kabiji wajinga. . .Aye wafwile. Aye kechi wafwile ne. Aye wayiletu na kwikala ne Nkambo Yesu.

¹³ Kabiji wajinga wakishika, mulongo wawama, kimye kyonse watele muchima ku bantu bakwabo. Kabiji kyajinga kyalusekelo kwi aye pa kukebela muntu kipona kyakwikalapo, inge bayiya ku kipwilo. Kabiji mwayukatu, kapepo, inge twaabuka kubunshiya bwa Kyabu, bushe kechi kyakonsha kuwama

kumukumanya Mulongo Taylor kokwa ne, witukebela mpuzha pa kwikala, ku lubaji lukwabo?

¹⁴ Nalangukuka mba, pa kivuluko kya Mulongo Taylor... Amiwa kechi najinga kuno pa kuuba mba naamba na Mulongo Neville ne, pa kijilo kyanji, bino Nasaka kwamba kyambo kyami kya kusachila, ku kituzhi wanji. Nyenga Taylor, Naketekela, uji muno lukeelo luno, apeshe muchima wanji walukokelo!

¹⁵ Mulongo Taylor, juba jimo waambile mba, “Waishile na kumona. Najinga na kizhiba kicheche popa, na bikilepo masabi, pakuuba mba mwafwainwa kwiya na kuloba masabi.” Kimye kyonse wateele muchima ku muntu mukwabo. Kabiji kwajinga Muntu umo wamutele muchima, ao wajinga Kilishitu, wamupele lupulukilo.

¹⁶ Nalangukuka, pa kumuvuluka, nangwa byonkabyo, kwa kino kipwilo, byo kyasambakana nobe mubiji lukeelo luno, twayai twimane pamo, tukunyike mitwe yetu kwi Lesa.

¹⁷ Taata Wetu Wamwiulu, atweba nobe bantu lukeelo luno, kabiji aba—aba beya kuno na kupopwela... Kuboko kwenu kukatampe kwamweka mukachi ketu ne kufumyamo umo mwi atweba mulongo wawama ye twatemwa, kabiji twayuka mba Anweba mwamutemenwe. Kabiji Anweba mwajinga na ene mambo akubila kikyee, Nkambo, inge ne kechi kyakonsha kumweka muyuwe musango ne, byo twayuka mba Baibolo wetu witubuula, amba, “Bintu byonse bingijila pamo mu kwibaletele byawama batemwa Lesa.” Kabiji byo kyaubiwe.

¹⁸ Kabiji tukeketa, mwaya ntanda, kabiji twatana bilengwa na lesa mu musango uji yense nakwamba kwi atweba, amba kilende kechi kyakonsha kumulama ne, mambo pano pantanda aye wamwesheshe mwingilo Anweba yemwamutumine mba obe. Aye wajinga wawama, mulongo walukokelo.

¹⁹ Twatana kuuba mba mu bumi bwa bichi, kabiji ne mu bumi bwa juba jiseela lukeelo na kwitupa kyeya. Kabiji pakachi ka juba kikala pakachi ka kimino. Kabiji mu kimye kya mabaanga abufuku kyafwa jibiji, kyabwela kyanguka lukeelo lwalondelapo, kyatalala ne kipya, mambo kyangila mwingilo wa kufukula kwa Lesa.

²⁰ Tumona maluba byo akoma ne kuwamisha ntanda kabiji wamisha ne mu bibamba bya bijilo, ne mampuzha kuji masongola, na kwingila mwingilo wao; kunshikula muchima wajo ne kupana, kyatutu, buki ku nyuki, kabiji ne kanukufyu kuyewa ubena kupita, buuya kuyewa wibukeba. Jipana byonse byo kiji nabyo, mu kwingijila Lesa, jabwela ja kunyika mutwe wajo mucheche. Pakuuba kimye kyalutepu inge kyafika, jibuka jibiji, mambo jaingijile mwingilo wakwa Lesa.

²¹ Nanchi ku meso a bilengwa na lesa byonse, ne Baibolo, mulaye, ne Mupashi Wazhila, twakonsha kusekela mu michima yetu, pa kuyuka mba Mulongo wetu Taylor, ne aye, Nkambo,

waingijile mwingilo wa Lesa. Kabiji kwamba mba kechi wakonsha kusanguka jibiji ne kikala kukana Baibolo wetu, Lesa wetu, kabiji ne bintu byonse Lesa byo etupa atweba kutalapo, pakuuba tuyuke mba kuji lusanguko. Nanchi tubena kupembelela kimye kyo tukamumona aye jibiji, byo akekala mwanike wa bumi bwawama kabiji kwakubula kukolwa nangwa kukota ne.

²² Peshai mukazhi wanji wawama, awa mulunda nanji walukokelo. Atweba kechi ntukamumona ne, pa kimye kyaba, Nkambo, byo twibamona kwendela pamo kuya ku kizhiba, ne kwikala pa bipona ya bicheche kokwa, na kuloba, ne kwamba, kabiji byo bajinga betemwa bingi.

²³ Kabiji pano twayuka mba kuji Juba jikatampe jibena kwiya, kimye biyangala bya lwitabilo po bakafoola na bulobo bukatampe bwakushinda, kabiji ba Malaika ba . . . na nyimbilo yawama ikakumbana mu lubesha. Tukebama ne jikwabo mu yoya mpuzha.

²⁴ Poso kyokya kimye, Nkambo, tupai lutundaiko. Tupeshai kabiji tukwashai. Tukapusana nanji Mulongo Taylor, ne yense wiya ku kino kipwilo, byo akemana pa kibelo ne kutana kifulo kya yewa wiya na kumvwa Kyambo kya Lesa, kabiji ne kwikala panshi na kukokoloka.

²⁵ Juba jikwabo byo apichile, Nkambo, Nalombele mba awa Malaika mukatampe wa Lesa waimene popa pa kibelo, na kumumwena kifulo, ne aye, Nkambo, kabiji wafwajilwe kwikala panshi. Mambo kyanembwa mu Baibolo mba, “Ba michima ya lusa bakobilwa lusa.” Poso twamumona aye, Nkambo, lekai byakuvuluka bitwajijile mu michima yetu, poso juba jimo byo tukakumana jibiji mu Ntanda ikwabo. Kupichila mwi Yesu Kilishitu mu Jizhina motwikipuzha. Amena.

²⁶ Aye kechi tukamumona mukachi ketu ne kabiji ne mukachi ka benyi, ne bakwabotu, beya ku kipwilo kyetu, nangwa kishimikwa kyetu kuno, na kupopwela. Lekai mweo wanji akokoloke mu mutende kumeso akwa Lesa, poso joja Juba.

²⁷ Juba jimo, ne atweba, pa muntu pa muntu tukaya, umo umo, poso byo tukapona mwaya ndoonda byonkabya. Twayai pano, kimye kyo tuji na kimye, kabiji twakonsha, twayai twinengezhe atweba bene mu kyokya kimye kibena kwiya; mambo atweba kechi twayuka kimye po kikobiwa ne. Atweba kechi twayuka ng’anyi ukalondelapo ne. Twayai twikale byonkabyo, amba pajuba pajuba, kyakuuba mba inge kyafwainwa kufika, kikekala ke kyetu, tukekala benengezha.

²⁸ Pano, Nafwainwa kutemwa kupana byakubijika. Pano, bukatataka, kapepo, kape, Amiwa kechi nesambapo na matulasiti mo nabwelela ne, mwaila kishimikwa kya—kya kipwilo kuno, nangwa kyo twafwainwa kuuba kyalondelapo, kwikala na kipwilo kyetu pakuuba mba twikale na mbung’eno

yetu. Nanchi Amiwa nkatwajijila, ndekelaiko mambo, na—na Tutetesho Tutanu na tubiji, kabiji ne Michiba Itanu na ibiji ya myalo, kabiji ne bintu byavula abyo byo twafwainwa kufikapo, ponkapotu.

²⁹ Kabiji pano, pa Mulungu wiya lukeelo, kokwa, Amiwa kekala ku Elizabethtown, Kentucky, na Mulongo L. G. Hoover, ku—ku pwijilo ya kuzhijika. Kabiji aako ke kuzhijika tabbanako mupya, nangwa tabbanako ye bapota ku Elizabethtown, Kentucky. Konka ku 62 kufika ne ku Elizabethtown, nangwa konka kwa, Natazha mu kuumba mba, 31, kufika ne ku turnpike. Ponka pa masanga, jakuya ku Elizabethtown. Paji pepi nobe awala umo. Kijitu pepi nobe sate-faivi, fote mailoshi kuya koka. Nalanguluka mba, pepi nobe fote mailoshi, mwaila kuya . . . mu 31, kabiji pepi nobe sate-faivi mailoshi, nangwa kintu kimo, jishinda jikwabo, kuya ja turnpike. Kiji mu Mukwakwa wa Mulberry.

³⁰ Kupwila kwa kuzhijika. Mulongo Hoover ukekala na sukuulu wa pa Mulungu wa kimye kyonse pa teni koloko. Kabiji Amiwa nkasapwila pwijilo ya kuzhijika, kufuma pa leveni kufika pa twelufu, awe Mulungu ubena kwiya, pa leveni Kapande.

³¹ Pa bbondi wa masawakya popa, paji—paji nsawakya wa jije jashi. Kabiji ikekela pa . . .Mwakonsha kutana jishinda kufumatu kokakwa. Kiji mu Mukwakwa wa Mulberry. Nangwa abo—abo bapana mwakwendela ku . . .Byabikwa pa bbondi wa masawakya popa palutwe ya kipwilo.

³² Nanchi, mu—mu Kapande pa—pa tweeti-tuu, Amiwa—Amiwa kekala ku Shreveport, Louisiana, tweti-tuu, tweti-fiili, tweti-foolo, tweti-faivi, ne—ne pa tweti-sikisi. Moba faivi, Nalanguluka, ku Shreveport, Louisiana, pa Bumi Tabbanako. Akyo ke ku Mulongo Moore. Bakasekelenga yubili wabo wa golonde. Aa mapesho a kipentekosito aponene ku Shreveport, Louisiana, myaka fifite yapitapo, pa tweti-tuu wa uno ng'ondo. Myaka fifite, mbila itanshi ya pentekosito yasapwijiilwe. Kabiji yaponene, Mupashi Wazhila waponene, mu Louisiana. Kabiji baji na kivuluko ku kyokyo, kabiji awe ke yubili wa golonde. Kabiji Amiwa kambanga kuyuwe yubili, mafuku faivi, na Mulongo Moore, ku Shreveport, Bumi Tabernacle.

³³ Umvwe muji na balunda kokwa ne mwazhokoloka, kika, bo mukeba kunembela, nangwa kintu kikwabo, tukekala balusekelo pa kutanwa naabo. Kabiji mwibabulatu na kupwila kubena kwiya palutwe.

³⁴ Kabiji Bumi Tabbanako, inge muntu umo waikalako kokwa na Mulongo Moore, aye ke muntu wawama. Kabiji akwa kuji bantu bawama bingi, aba bakala bena Kabete kabuyeke. Anweba kechi mwakonsha kwibashinda ne. Kabiji nanchi, Bumi Tabbanako, uji yense ku Shreveport wakonsha kwimubula po iji.

Shreveport uji pepi nobe bantu tuu aduleendi sauzande. Kabiji ke muzhi wawama, kabiji manzubu avula. Nanchi. . .

³⁵ Kabiji awa tabbanako ke tabbanako wabaya, tabbanako wabaya bingi. Iji na byapeulu, ne bibamba byapeulu, kabiji ne kine kibamba, kabiji kwaikala ne kibamba kiji palutwe. Kabiji muji mpuzha yabaya bingi. Kabiji kokakwa pabushiya bwa kishimikwa kya muzhi mwikala bantu faivi sauzande. Kijitu—kijitu pamo nobe kukilang'anya mukwaakwa papo, kuya ku kinshimikwa kya muzhi.

³⁶ Kabiji Rev. Jack T. Moore, nangwa—nangwa Bumi Tabbanako ku Shreveport, Louisiana. Akyo kitatula kwikalako pa tweti-uu. Akyo kikekala ke Pakisa-. . . Pakina kufika ne pa Mulungu. Pakina, Pakitanu, Pakibelushi, Pamulungu mooba foolo mu kifulo kya moba faivi. Ndekelaike mambo. Akyo kikekala pa tweti-tuu, tweti-fiili, tweti-foolo, ne tweti-faivi. Nalanguluka mba abyo byobyu kiji, mu—mu Kapande.

³⁷ Kabiji pano, po tukatana byo twaubako, byo twaubako namambo a kipwilo kuno, po tukayuka kipwilo byo kyaenda na mambo a kishimikwa kyakyo. Bashimika betubuula mba bakabikako bantu bamvula, kyakuuba mba pepi nobe mooba teeni twakonsha kwikala nakyu twaikalamo, monai, bukiji bukiji. Kabiji babena kupembelelatu muzhi wafwachika. Mwayukatu, kabiji twafwainwa kwikala na mpuzha yabaya bingi ya kwimikapo myotoka, kabiji ne byavula *bibye*. Kabiji, oo, ami, ke jibumba ja tepu uchila pa kuuba mba mutwelemo, kutatula kushimika kiji kyonse. Bino Nakonsha kutemwa kufika ku kipwilo kasa Kyangye kubwela mu mwingilo jibiji.

³⁸ Pano Amiwa nji na lwito lwakuya ku Tanganyika, Uganda, kabiji ne kupita konsekwa. Yosefwa watachika mbung'eno kutatula mu Kubomukata.

³⁹ Kabiji keesha, byo Natwelele, mwajinga balongo bamo, ne Nyenga Tomo ne bakwabo, bafuma mu byaalo bya kubushiya, bayiishile. Kabiji bajinga. . . Nataine kalata pa kibelo kyami, nangwa—nangwa lwiito lwakufuma ku—ku kipamo kya ku South Africa. Nanchi Mbena kunemba kwi abo, pakuuba mba tumone bintu byafwainwa kubiwa. Kapepo, kimye kyo Nji kwalepa, Nakonsha kufika ku South Africa, kapepo, mu lubaji lwapelako lwa Kubomukata ne Kisaka, mu kyokakya kimye.

⁴⁰ Kabiji twaketekela mba kipwilo kikemana, pakuuba mba Nakonsha kufika ku Mankulo a Bipwilo, kasa kikyangye—kasa kikyangye kufika mu kimye kyamashika, inge kyakonsheka. Inge Nabula kuuba byobyu, nangwa inge Nakonsha kubwela pakufuma kookwa, inge Nkambo Yesu wabanda kwiya.

⁴¹ Natelekelenga keesha kimye kyo Natelekelenga, naketekela jajinga juba japita kufuma mu keesha, pa tepu. Nakulanguluka mba Najikutelekanga leelo lukeelo luno. Umo mulongo mucheche wa Kukabeta kabuyeke wajinga. . . Bainanji baishile

mu mbung'eno. Wajinga na kilonda pa jibele janji, kabiji wajinga wamvwetwa na kivule kya lufu. Kabiji Mupashi Wazhila, mu kupwila kumo kwajingako katataka, ku Southern Pines, Naketekela iko, nangwa kuntu kukwabo, wamubijile, waambile namambo akikola, kabiji ne byo ajinga, ne koafumine. Kabiji waambile mba wajinga na nsongwalume wajinga wabwela munyuma, kabiji wailenga kwikala na mapuso, kabiji kwafwainwa kwikala kwipayang'ana kwa mapuso. Kabiji bintu byavula byayewa musango. Kabiji awe mulongo . . .

⁴² Byamwekeletu byonse monka mo byaambilwe. Kabiji ne kilonda kya kaasa, nangwa kitumbwatumbwa, byonkabyo, kyamushile. Akyo ke, kitumbwatumbwa ke kaasa, mwayukatu. Nanchi pano kya—kyamushile. Kabiji nsongwalume wajinga waipayang'ene kya mapuso, kabiji ne bintu byonse monka mwaambijile Mupashi Wazhila. Kabiji watangijilwe kwi Kilishitu, ne jikwabo. Kabiji walengele tepu pakikyeye, kabiji Na—Na mumvwine kasa abena kwimba. Bushe mwakumvwa bulongo aya icheche, misambo ya Kabeta kabulenge nyi? [Kipwilo kyaamba mba, “Amena.”—Waku.] Waambile mba, “Akwa ku Caroliner wa ku Kabeta kabuyeke,” aye byo aambile. Oo, Natemwa kyokyo, aba bakala bantu baku Kabeta kabulenge. Kabiji aye wajinga . . . Aye Nkambo wamupesheshetu. Aye waambile mba, “Nayuka wamba mba kechi usampwila lufunjisho ne, Mulongo Branham; kanatu ku kipwilo kyobe.” Waambile mba, “Atweba twilubaji lwa kipwilo kyobe.” Nanchi akya kyajinga kyafuma mukachi kanji, pa kwikyamba byobyoy.

⁴³ Kabiji pano kuji kipikichala, byo Nalanguluka, kapepo, kiji pa bbondi wamasawakya lukeelo luno. Inge kechi byo kiji ne, Billy ukekibikapo. Bimye byavula kyaambiwa mba, patanshi byo Natatwile kwamba, bamba mba, “Obewa ufwanyikizhatu, Mulongo Branham, amba umona akya Kyeya, akya Kyeya.” Kapepo kuji, kafwako . . .

⁴⁴ Kwafwainwa kwikalapo bamo bashalapo muno, bajingako-kala kunyuma, kipikichala Kyakyo kasa kikyanye kukopewa. Mujipo umo muno wakonsha nkumvuluka byo naambilenga byobyoy, kunyuma kwine? Talai. Pepi nobe foolo nangwa faivi maboko. Nyenga Spencer kuno, kabiji Mulongo ne Nyenga Slaughter, kabiji—kabiji mulongo *papo*, ne mulongo *kokwa*. Abo bajitu pepi nobe faivi nangwa sikisi bakishalapo—bakala.

⁴⁵ Kyawama, pano, pakupitapo kimye, jiso ja king'amba ng'amba kya kamela jakopele kyokya kipikichala. Nanchi kyatwajilwe ku Washington, DC ne kupita mumpeselo ya basendwe, ne kubwela jibiji, “Kechi kyajinga kyeya kyafikijilepo jibiji ne nangwa kafwapo kyajingapo ne.” Waambile mba, “Akya Kyeya kyasamine pagalashi.” Awa ke George J. Lacy. Kuji jizhina janji jafwachikile. Mwamona?

⁴⁶ Kyawama, nanchi, bimye byavula mumvwa mba, talai ne

kwamba mba, “Kuji kivule kifita ku *yuwe* muntu. Kyamvwetwa na kivule kya lufu.” Baanga bang’umvwapo kwamba byobyo? Bimye byavula, monai, bimye byavula. Kyawama, kyamwekele kuuba mba awa kamela wakopele kyokya. Kabiji nanchi tuji na kikye kuno.

⁴⁷ Aye inetu wayishile kwi nyenga kabiji wamubujile mba, mu mbung’eno mu—mu Carolina, ako kotwajinga na mbung’eno yawama bingi ku Southern Pines. Kabiji kokwa, inetu wafwilenga na kaasa pa mabele anji abiji. Kabiji badokotala bamulekeletu mba afwe. Kabiji inetu waile konka ne kukopa kipikichala kyanji, nobe byonka byo Namubujile byo aji, ne ko afumina. Kabiji Naambile mba, “Kuji kivule kifita kwi obewa. Obewa wamvwetwa na kivule kya lufu.” Kabiji inetu wakopa kipikichala kya bibye. Kabiji abyo byokiji pa jiso ja king’amba ng’amba kya kamela, jatola kivule kya lufu.

⁴⁸ Inge anweba bonse mwamwene *Aya Mikambizho Jikumi*, kabiji wamwene malaika wa lufu, byo yatwelele mukachi, aya fishi, kivule kumweka-kufituluka, kiji pa kikye kipikichala. Kabiji Naketekela mba kiji pa bbondi wamasawakya ponkapano. Inge kechi byokiji ne, Billy wakonsha nkung’umvwa, kika, kumwambila wabika pa bbondi wa masawakya. Kabiji kiji na muketo watongola ku muntu. Kabiji muntu, kivule kyafumapo pa mwanamukazhi, kabiji wabukilwe mujishinda ja kukumya. Bino kuji nobe bwazhinguluka, bwishi bwafituluka bwabungizhiwa pamo kabiji bwazhinguluka inetu, kabiji bwakobama pa yewa kaasa, nakufuma ponkapa. Mambo, akya ke kivule kiya na lufu, ne apo, kufuma ku kaasa.

⁴⁹ Kyawama, nangwa weseke byepi kubuula bantu Bukine, kuji muntu umo ukafwanyikizha amba Kechi kya Bukine ne. Kabiji inge kimye kyonse ubuulang’ana Bukine, nanchi wayuka mba obewa—obewa ujitu bulongo.

⁵⁰ Njina mulunda ao—ulama bang’ombe, akwa ku Musela. Kabiji—kabiji kipamo kilamawizha kyalipijile pepi nobe foolo sauzande madolla pa kupota motoka wendamusino, pakuuba mba babelenge mikambi ilume amwa mu Kipachiko Kyamakatazho. Mr. Jeverez waikela muno mu kipwilo, Namuletele kwi Kilishitu, kilubi wapwijijika. Kabiji anweba mwang’umvwapo kala kubulang’ana jishimikila ja kwiya pamo. Kabiji aye kechi waketekejile mu kintu kikwabo ne kana buyuke bwa Darwin. “Kabiji awa Mwaana, wasemwamukisungu, wajinga wabula maana.” Kabiji twaikajile bufuku bukwabo ponka po atambwijile Kilishitu.

⁵¹ Kabiji nanchi awe mwanamulume wibabujile. Aye waambile mba, “Pano, kechi wafwainwa kupota awa motoka ne, awa wendamusino.” Waambile mba, “Nakonsha kwimubula baanga makalala ama diyala baji kokwa.” Waambile mba, “Kuji naitiini.” Waambile mba, “Kwajinga tweti-. . . Kwajinga tweti-

wanu, kabiji Naipaile babiji.” Kabiji aye waambilenga ku mukulumpe waba gemu. Kechi wafwainwa kwipaya ne kanatu umo. Nanchi aye waambile mba, “Kwajinga tweti-wanu, kabiji Naipaile babiji. Pashala naitiini.”

Kabiji aye waambile mba, “Ee, Jeff, Nayuka mba waipaile babiji.”

Aye waambile mba, “Byo naubile.”

⁵² Kyawama, basendele motoka wa musino, wayile kokwa, kwajinga mitwe naitiini ya badiyala. Aye waambile mba, “Billy, inge wabuulatu muntu kya bukine; aye kechi wikiketekela ne.”

⁵³ Nanchi akyo byo kijitu. Obewa wakonsha kubuula bantu kya Bukine, kabiji nangwa byonkabyo. . . Kuji kubula kumvwisha kwabaya bingi ne—ne kwamba bubela pa bintu poso babula kuketekela mba ubena kwibabuula Bukine bino kasa ubena kubulang’ana Bukine. Mwamona?

⁵⁴ Bino twasata bingi pa kuuba mba tuji na Taata Wamwiulu Ao ushinikisha kya Bukine na kushiniikisha. Kya kine. Nanchi inge jino jafwainwa kwikala juba jami japelako pantanda, ya . . . ne kupesapesa kwa masayaasi ne kumweshwa mba Nabulang’ana Bukine pa bibye bintu. Abyo ibyo. Ke Bukine. Nanchi kapepo kikekala pa bbodi wa masawakya. Billy, uji mu kibamba momo nyi? Anweba muji nakyo mu kuboko kwenu, kipikichala? Kabiji umvwe uji nakyo, kyawama, kilupulai kuno, nanchi wafwainwa kwikibika muno, pakuuba mba kape bakonsha kwikimona. Kyawama, Amiwa kechi nayuka ne. Pafwainwa kwikala kyeya pa—pa bbodi.

⁵⁵ Kabiji kino kyo—kino kyo kipikichala kuno. Naketekela mba kechi mwakonsha kwikimona ne. Bino *papo* mwakonsha kumona kivule kya lufu kyafituluka pa yewa mutwe wa mwanamukazhi. Kabiji papo paji byanembwa-po pa kikye kunyuma *kukwe*, apo inetu po akopejiile kipikichala, kabiji ne kumona kana kine kyamwesheshe. Kabiji abyo byokiji, pa—pa kyokyo. Ke kivule kya lufu kyafituluka.

⁵⁶ Monai mwanamukazhi, umo ponkapa? Mwikimona, Naketekela, Mulongo Neville, kechi ibyo nenyi? [Mulongo Neville waamba mba, “Ee.”—Waku.] Uu-uu.

⁵⁷ Nanchi, Billy kape wakonsha kwi kibika pa bbodi wa masawakya, inge wakonsha, Billy. Iya, wikitole, ne kwikitwala kulutwe kabiji ne kwikibika pa bbodi, pakuuba mba muntu yense wafwainwa kwikimona pa kulupuka pangye. Aye nangwa Doko, umo pa baabo. Pano Nalangulukile mba, kapepo, kyakonsha kumweshwa bulongo pa kuuba mba mwikimone, bino popa paji bingi fishi pa musango wa kyokya kipikichala. Bino aye usakwikala nakyo kokwa, pakuuba mba mwakonsha kwikimona, pakuya pangye.

Pano, vulukai byonse bya kubijika.

58 Kabiji pano, lukeelo luno, Nalangulukile mba kape twakonsha kwambako pacheche pa kintu kimo kyakutundaika kipwilo, kintu kimo kyakonsha kwimupa byavula . . .

59 [Mulongo Doko Branham waamba mba, “Nakeba kyokya kifulo?”—Waku.] Waamba mbaka? [“Nakeba mba akya kifulo kikale ponka?”] Ee, Doko, inge wakonsha. Kyakonsha kwikala kyawama.

60 Nasaka kwingijisha kikye papo. Najinga na . . . Bamo mwi abo kechi bajinga na kyakubikapo ne, mulungu wapwa, nanchi twalangulukile mba kape kyafwainwa kwikala kyawamako leelo. Nakukebanga kwambapo pa kikye, mambo kyatala ku—ku kiloto kyajinga na nyenga.

61 Nakumya kana Nyenga Kafunga uji mu kipwilo lukeelo luno. Namukumenye bufuku bukwapo. Kabiji kimye kitanshi kyo Namwene mwanamukazhi, kine, Amiwa kechi nayukile ne kana ye ng’anyi. Iye nyi? Naketekela mba kechi ye iye ne. Ee. Wakonsha kutako muchima, bushe kyakonsha kwikala kintu kingi, inge Natazha ku kyokya kiloto, Nyenga Kafunga? Anweba kechi mwakonsha kutako muchima ne, mwakonsha nyi? Kiji bulongo. Kijitu bulongo.

Kabiji kasa tukyangye kufwenya ku kyokyo, twayai tukunyike mitwe yetu jibiji.

62 Taata Walusa Wamwiulu, kwi Anweba twapana lutotelo namambo buwame Bwenu ne lusa. Kabiji pano, tuzhindamikai, Nkambo, pakuuba mba tufunde Kyambo kya Lesa mumi, byo Kibena kwiya kwi atweba kupichila mu kimwesho kabiji ne kwikajikwa na Mupashi Wazhila, kasa kyaikajikwa na Baibolo. Nanchi twalomba mba Anweba musakwitupa kukwatakanya, pakuuba mba tuyuke kya kuuba mu ano mooba apelako byo tubena kumona bulume bwa mipashi yatama kasa ibena kwituzhokoloka. Nkondo, nkondo yapelako iji pepi kulwiwa. Tukwashai, Nkambo. Nobe beene bashilikale, bakonsa, lekai tulame jikebo ja Lwitabilo, na Kyambo kya Lesa, Poko, ne kuya kulutwe. Mu Jizhina ja Yesu. Amena.

63 Pano, kulanguluka kuya kulutwe, nkondo, nobe aya—aya nkondo yatachikwa, yanengezhiwa kuya mu kulwa, aya—aya nkondo yakine, kulwa bulwi bwa lwitabilo.

64 Nyenga Shepherd muno, ne Mulongo Kafunga, abo ke balunda netu bawama bingi, kabiji beya ku ino tabbanako. Kabiji ke baana bawama ba Lesa. Kabiji—kabiji awe Nyenga Shepherd, kimye kyo Natolelenga makalata ami, ayewa musango Billy oo akonsha kupana mukumbu, muntu umo waamba mba, “Ntuminai byakuvwala byavula byakulombelela.” Kabiji Nekwibilombelela. Aye upanatu mukumbu. Pakuuba inge yaikala kalata ya muntu bunke, Nafwainwa kupana mukumbu amiwa mwine, mwamona. Nanchi Natolele makalata ami abunke, ne kwiatwala kunzubo. Kabiji Natangilenga mukachi,

kyaambiwa mba, “Kufuma kwi Nyenga Shepherd.” Kabiji kyajinga kiloto kyo ajinga nakyo, kya—kya bang’ondo bamo bapita. Kabiji aye kechi wayukile mo kyatala ne poso ibiji nangwa isatu Milungu yapita, po Nafunjishe pa aao—aao *Mankulo Atanu na abiji a Bipwilo* ne—kabiji ne—bipangwa sebeni, Petelo Wakibiji, byo kisenda, Petelo Wakibiji 1, “Kubikapo pa lwitabilo lwetu.” Mwamona?

⁶⁵ Kitanshi, kintendekesho, ke Lwitabilo. Kyabubiji, bikaipo pa lwitabilo lwenu, bulume; pa bulume bwenu, maana; kufuma mu maana, kwikanya; kufuma mu kwikanya, butekanye; ku butekanye, bulesa; kabiji kufuma mu bulesa, butemwe bwa balongo, butemwe bwa balongo; kabiji ne butemwe, jo jibwe jajikoka. Sebeni wa bibye bintu. Mankulo abipwilo bitanu na bibiji, monai, kabiji ne tubaangabanga twa bipwilo, kabiji byonse byabikwa pamo na Mupashi Wazhila.

⁶⁶ Pano, akyo byo byo kyubiwa pakwikala kalume wakwa Kilishitu. Kilishitu wanshimika Kipwilo Kyanji mu mankulo abipwilo bitanu na bibiji; Musongwa Wanji, ke Muntu, mwanamukazhi, Kipwilo. Mankulo a bipwilo sebeni o alenga Musongwa. Bamo mu *ino* nkulo, kabiji bamo kufuma mu *yoya* nkulo, kabiji bamo *muyoya* nkulo, kabiji bonse pamo, kabiji ne kwikishimika nobe pilamenda.

⁶⁷ Nobe Enoka, ao washimikile pilamenda, yo twaketekela. Kabiji jibwe ja jikooka kechi ja bikilwe peulu yajo ne, mambo mutwe wajikooka wasujilwe. Kabiji twasenda pano, kechi nobe Lufunjisho ne, bino nobe kukwatakanya, kwa kipwilo kuno. Amba abo . . .

⁶⁸ Lesa wilenga Ayemwine mu basatu. Aye wilenga Ayemwine walumbuluka mu “Taata, Mwaana, Mupashi Wazhila,” maofweshi asatu a Lesa umo. Aye wilenga Ayemwine mu “lubingisho, kutokeshiwa, lubatizhilo lwa Mupashi Wazhila,” kileta bulumbuluke, mingilo isatu ya bupe. Aye wilenga Ayemwine kwikala walumbuluka mu kwiya kusatu: kimye kitanshi, na kukuula Musongwa Wanji; kimye kya bubiji, kutambula Musongwa Wanji; kimye kya busatu, mu Myaka kiumbi kimo na Musongwa Wanji. Kabiji bintu byonse byalumbululwa mu bisatu. Kabiji sebeni ke nambala ya bupopweshi ya kwa Lesa. Lesa upopwelwa mu sebeni, kupwijijika, pano kyalumbuka ne kupwijijika.

⁶⁹ Kabiji kintu kyenye kyajinga kuuba mba, kechi kuletamo kikyene, bino kwi mumweshatu anweba, diyala wapeleleko ye Naipaile wajinga na mapoiti faivi ku lubaji lumo kabiji asatu kulubaji lukwabo; monai, bupe ne kulumbuluka.

⁷⁰ Pano monai pa kikyene, amba Kilishitu. Lesa wanembele ma Baibolo asatu. Aye Baibolo mutanshi wajinga mwiulu, watelwa mba zodiac. Pano, inge kechi mwayuka Buuku wa Yoba ne,

lubaiko pakikye, mambo, mambo Yoba ye wikilondolola, byo atajile peulu ne kwibitela mazhina abya bintu biji mwiulu.

⁷¹ Kabiji monai, mu zodiac, watatwile naka? Kintu kitanshi mu zodiac ke kisungu. Kintu kyapelako mu zodiac kyajinga Leo awa bonkwe. Kwiya kutanshi kwa Kilishitu, kupichila mu kisungu. Ako Kwiya kwa bubiji, Leo aye bokwe, Bonkwe wa kisaka kya Yuda.

⁷² Pano Enoka wapwishishe mu juba janji, nangwa kunyuma mu joja juba, pilamenda. Kabiji kyakonsha... Mambo, kechi tuji na kimye kya kubwela panyuma ne kabiji ne kumweshwa mba pilamenda yaishile kupita mu bibamba ne bintutu bikwabo. Kyaamba kufikatu ne kimye kyakupelo pano. Baji mu kibamba kya mfumu, mwaila kupima. Bino jibwe ja jikoka kechi jabikilwe pa pilamenda ne. Kabiji akya kileta kulumbuluka, mwaila shimikilo, nangwa—nangwa shimikilo. Posotu, kyakuuba mba...ne kanezala kakacheche...Kechi bayuka ne byo bekishimikile ne, kechi bakwatakanya ne, bushe kalezala kafwainwa kupita mu lubaji amo mwakonsha kupita ndaka. Kabiji kechi mujipo ndaka mukachi ne. Kyalumbulukatu, pa kubikwa pamo.

⁷³ Nanchi abyo byo byo kiji inge Kilishitu ne Kipwilo baikala ke kimo. Kechi pajipo ndaka pakachi kabo ne. Kechi kujipo nangwa kimo pakachi ne; kanatu Lesa ne muntu. Lesa, Kilishitu, ne muntu.

⁷⁴ Pano, bino, mutwe wajikooka, kechi bamutaine ne. Anweba mwayukatu Jibwe ja ku Sikoni jo bajinajo mu England, ja kuswanyikilapo ba mamfumu, nangwa ku—kuvwikwa, ne bikwabotu. Pakuuba mutwe wajikooka... .

⁷⁵ Monai pa dola Mwinamerica. Mwakonsha kumona kana... . pa dola Mwinamerica, ku lubaji lumo, lwa kipiko, ke katetesho ka Kinamerica, mpungu uji na... .na mafumo mu maboko anji, ku lubaji lwa bubiji, ako katelwa mba katetesho ka “bwina United States.” Pakuuba kulubaji lukwabo ke pilamenda kabiji, peulu yakyo, jiso jikatampe, kabiji mushi ajo papo kyanembwa mba, “Katetesho kakatampe.” Kika kyakwikela mba “Katetesho kakatampe” mu kino kyaalo, kukila ne pa katetesho ka kyaalo kyetu? Mwamona?

⁷⁶ Nangwatu kyonse kyo wafwainwa kuuba, Lesa wikilengela kyaambatu musango umo. Mwamona? Aye ulengela ndengamambo kwikyamba. Aye ulengela kyaalo kwamba pe akyo. Bintu byonse byafwainwa kwamba pe Aye. Nangwa anweba—anweba mubena kukeba Kwikiketekela nangwa ine, Kijitu byonkabya.

⁷⁷ Pano, monai, muji jiso mu kyokya, jiso ja Lesa. Kabiji mambo akuuba mba jikooka kechi jafuminepo ne, Mutwe wa Katetesho, mambo Bamukaine, ao ye wajinga Mwaana wakwa Lesa; aja Jibwe ja kintendekesho, Mutwe wa Katetesho ka

pilamenda, kabiji ne byonse bye. Pano—pano, Amiwa . . . Amiwa kechi natemwa ku . . .

⁷⁸ Kimye kimo abye bintu bebibika pa matepu, kabiji biya ne mu balongo mu bipwilo, ba mubipwilo bikwabo. Kabiji umvwe bauba kyokyo, nanchi balongo kimye kimo kechi bekimona bulongo, amba Mbena kwambapo kintu kimo pa balongo. Bino Amiwa kechi byonji ne. Amiwa . . . Inge mwakonsha kuteleka ne kukwatakanya, monai, Amiwa kechi mbena kwamba kyatama ku mulongo uji yense ne. Mambo, akyo kechi kyafwainwa kuuba ku balongo ne, kwamba byatama umo ku mukwabo ne. Twafwainwa kwamba byawama umo pa mukwabo, kechi kwamba byatama umo pa mukwabo ne.

⁷⁹ Pakuuba inge Naamba kimye kimo namambo a kabungwe kamo, nobe ba Presbyterian, Methodist, nangwa bikwabotu, baamba mba, “Monai, aye wikishikwa.” Amiwa kechi nashikwa mulongo uji momwa ne, nangwa nyenga uji momwa ne. Ntachikilo ileta lwabano ku balongo na balongo yo ng’amba mo kyatamina. Lesa baana banji kisemi kimo, kabiji kechi—kabiji kechi mabumba akwabo ne.

⁸⁰ Kabiji bamo baamba mba, “Amiwa kechi jipo na kintu kimo kyakuba nakyo ne, mambo aba ke ba Presbyterian. Kabiji Amiwa ne Methodist.” Mwamona? Pano, akyo kechi byokiji ne. Mwamona? Ke ntachikilo ya konka kabungwe ichibakanya bobwa bulongo. Mwamona?

⁸¹ Pano, amba, nobe byonka byo Ng’amba, inge ubena kuya mwaya mukola mu kabwato-kabula kukonsa ne, kasa weseka kuya na kupita pa mpota, kabiji Amiwa nayuka mba akyo kechi kisakwingila ne, kyawama, nanchi, Amiwa kechi mbena kujila ne, na kwi mulengulula anweba ne. Mbena kweseka kukufumya mu bobwa bwato. Mwamona? Mambo, ke bwato boobusakonaika, kabiji—kabiji—kabiji obewa ukashala, waikala bunke, mu meema. Nanchi—nanchi kechi ke—kechi ke mulongo mu bwato ne, pakuuba Mbena kubijika ku mulongo mu kumubuula kintu kisakumweka.

⁸² Kyawama, aye yonse ntachikilo, abyo bantu byo balenga pakuuba mba bamwenemo byafwainwa konaika. Byo byonka. Bafwainwa kwiya . . . Twafwainwa kufika mu bu umo, pa butemwe bwa balongo. Akyo kyaikala kyo kimiko kya mu bumi bwami kweseka kukwatakanya kabiji kechi konauna kabungwe ne, pakuuba baleke milanguluko yabo, kabiji ne kwikala balongo kuyese wasemwa-jibiji Mwinakilishitu. Mwamona? Kuuba mba, ao ye mwine mulanguluko. Apo ipo po Naimena, kyawama, pano, inge balongo bakonsha kwikimona. Ami . . .

⁸³ Bavula ba balongo betu, ne mu baji Mamboawama Apwijijika, kechi baketekela mba ba Baptist ne ba Methodist, kabiji bena Luther ne abo, baji na kimye. Bino, pano, kapepo kyakonsha kwikala kyakine. Bino Amiwa kechi mbena

kwitabizha kyokyo ne. Naketekela mba aya nkulo papo, nkulo ya bena Luther, mu iye nkulo *papo* yatelwa mba, Naketekela, Nkulo ya Saladisa. Kabiji ne nkulo ya Filadelifya, ya ba Methodist. Kabiji pano ke Pentekosito, Nkulo ya Laodikeya. Naketekela mba aa ke mankulo. Kabiji Lesa, mu imo ya oa mankulo, watolelemo bantu basalwa. Kabiji mu kyokyo, nobe byonka byaamba Bahebelu 11, mba, “Abo kwakubula atweba kechi balumbuluke ne.” Mwamona? Bino pano Kipwilo kyafuma mu *kikye*, na kwiya mu bacheche kimye kyonse, poso Kyafika mu nkulo ya Pentekosito.

⁸⁴ Pano, ene mambo o Mbena kwambila kikye, pakuuba mba mwikaleko na buyuke pa kyokya kyalotele nyenga. Kabiji kiloto kyanji kine kyaikala kyaesakana pamo na kyokya kyo Mbena kufunjisha.

⁸⁵ Monai pano papo, pano, byonse bye bintu Petelo Mutanshi wabu 6 ne wabu 7 veleeshi byo emubuula, kufum-...konka kulwitabilo, akyo ke kitanshi. Pano, Naamba mba bantu baamba mba baji na bubwe bulume wakubula ne kusemwa jibiji ne. Kabiji Naketekela mba Naamba ng’ambilo yakonsa ya kwamba mba, “Kijitu pamo nobe ng’onyi ufita ubena kwimvwika mayona anduba aye mwine, ne kwilenga aye mwine kwikala nduba.” AAye kechi wakonsha kwikyuba ne. Kwafwainwa kwikala mayona akisemwa amena ku mubiji wanji. Amwa mukachi kanji mwine mwafwainwa kulupuka mayona.

⁸⁶ Kabiji kimye kyonse, Amiwa kimye kyonse nampewa mambo akwamba byakonsa pa nyenga yetu, namambo a kwikala na nsuki yakwichika, kabiji ne kutenda suki kubilungi byabo, ne bintu bikwabo. Amiwa kimye kyonse bazhachisha kwikala wakonsha na banyenga yetu. Kechi—kechi kyakuuba mba Njina kintu kimo kyatama ne abo ne. Amiwa kechi ng’amba mba mwanamukazhi kechi ke mwanamukazhi wawama ne, amba ke kyende endetu nangwa kintu kimo. Akyo kechi po naimena ne. Pakuuba, ke kino, umvwe wabika byavula byakulenga pa mubiji wanji, kilumbulula mba mukachi muji byavula byakulenga, monai, amo mwafwainwa kuyulwa na Kilishitu. Mambo, mwekelo ya pangye kimye kyonse imweshi biji mukachi. “Ko kubipangwa byabo ko mukebayukila.” Mwamona? Kabiji amo Kilishitu mo afwainwa kwikala, kabiji ne kulamawizha bya kwa Lesa, kabiji ne kuta muchima ku bintu bikwabo abyo bya kwiwamisha ku mubiji, kabiji mwayukatu, ndabo ya mazhamatamba, kabiji ne mwekelo yabula-ya bumuntu, kabiji ne bintu byonse byayewa musango. Amiwa kechi ngya kubyobyabintu ne, kabiji kechi Naketekela mba ne Baibolo naye wauba byobyoye ne, nanchi Natemwa kwikalatu byonka byotuji.

⁸⁷ Monai, pano, inge kechin ujipo na ngala ne, kabiji wakeba kuvwala ya kuvwala; inge kechi ujipo na meno ne, kabiji ukebapo amo; kechi uji na mukoko ne, kabiji ubena kukeba umo; kechi uji na suki ne, kabiji ubena kukeba imo; kechi uji na bibye

bintu ne, akyo kyapusanako. Pakuuba umvwe wafumyamo meno obe awama, mambo kechi atokesha byo afwainwa kwikala ne, nishi obewa wauba kintu kyatama. Inge uji na suki ichila, kabiji ubena kukeba ifita, kabiji waya na kwiyiipeta musombelo ufitu, mambotu akuba mba; waya mungi. Ee, Nalanguluka byobyoy. Bino kine kintu. . . Kechi kujipo Kinembelo kya kyokyo ne. Kanatu, konka kwichika suki, kuji kinembelo kya kyokyo, ee, tuji na byavula bya byobyoy, nanchi tubena kukeba kuyuka mba abyo ibyo, pano.

⁸⁸ Pano, nyenga yetu, mukiloto, walotele mba. . . Kyawama, patanshi, wajinga wakatazhiwa. “Ng’anyi buwame bwa kutwajijila na kuuba byobyoy, ne kwesekwa kushupikwa na bumi, inge Lesa witukeba atweba mba tutambule Mupashi Wazhila kabiji kechi tuji Nanji ne?” Pano, Amiwa kechi nalanguluka ne. . .

⁸⁹ Abo kape babena kukopa bibye. Pakuuba inge kechi babena kuuba ne. . . Inge bauba, ke kya kipwilo bunke byakyo. Mwamona? Pano, kabiji inge mulongo umo wafwainwa kukwatakanya kikye, kabiji mwaumvwa jiwi jami, mulongo, pa kikye, vulukai, Amiwa mbena kufunjishatu ku kipwilo kyami. Anweba kimye kyonse, ku meso a kipwilo kyenu, pesapesai aa—aa matepu, kabiji umvwe kechi ukeba kipwilo kyobe kwibyumvwa ne, kechi mwibaleke beyumvwe ne. Bino Amiwa mbena kwesekatu kwamba ku jije jibumba jicheche papo, amba—amba Mulongo Neville ne Ami, kupichila mu Mupashi Wazhila, tubena kweseka kwi—kwibafunga ne kwibafunjisha.

⁹⁰ Pano, kuji bintu bimo abyo byo wafwainwa kupachika nabyo. Nanchi inge pajipo bimo, kijitu pamo nobe byonka byo Ng’amba pa kuja nzolo wakusalula, “Inge wasuma pa kikupa, kechi wafwainwa kutaya nzolo ne. Obewa utayakotu kikupa.” Nanchi kimye kyonse ubaikotu kyokyo. “Kuja pai wa pilipili, kabiji wasuma pa lukunwa, kechi wafwainwa kutaya pai ne. Obewa utayakotu lukunwa.” Nanchi wauba kintu kimo pa kuteleka ku Kikye.

⁹¹ Pano, Na—Naketekela mba—mba—ene mambo kyo kwavujila kivundakanya kyabaya leelo, pa Mupashi Wazhila, kechi kifunjishiwa bulongo ne. Naketekela mba lubatizhilo lufunjishiwa. . . bambatu mba “lubatizhilo.”

⁹² Kabiji pano kijitu pamo nobe byo baamba mba “motoka.” Bino pano Njina bintu byavula byabikwa mu kino kipwilo, kabiji kechi Nayukapo kintu nangwa kimo pa kikye ne. Nanchi inge Nauba kilubo, balongo, Amiwa. . . Vulukai, Amiwa kechi ne makanika ne. Kwafwainwa kwikala makoilo, ne mapulangi, ne mapoiti, ne mavavu, kabiji ne bintu bikwabo byashala, abyo byo byalengwa motoka.

⁹³ Kabiji umvwe waamba pa lubatizhilo lwa Mupashi Wazhila, kuji byavula bitanwa Nakyokyo. Uu? Mwamona? Kuji byavula

bitanwa Nakyokyo. Kabiji abye byo Nalanguluka mba Lesa byo abena kushinikisha: Mupashi Wazhila uji pano. Mwamona?

⁹⁴ Pano, Petelo waambile mba, kitanshi, “Lwitabilo.” Pano kimweshai bulongo. Tusakufunjisha kikye pa mamineti acheche. Lwitabilo, pano, kyo kyenu kitanshi. Kabiji bikaipo pa lwitabilo lwenu, bulume; pa bulume bwenu, maana; ku maana enu, kwikanya; ku kwikanya kwenu, butekanye; ku butekanye bwenu, bulesa; ku bulesa bwenu, butemwe bwa balongo, butemwe bwa balongo; kabiji ne butemwe. Kabiji uji yense wayuka mba butemwe ye Lesa. “Lesa butemwe.” Mwamona?

⁹⁵ Pano, nanchi, kufuma mu kikye, kabiji ne kuleta kikye mu mankulo abipwilo bitanu na bibiji. Lesa ubena kushimika, mu mankulo abipwilo bitanu na bibiji, Musongwa wa Kilishitu; kupita mu Filandefya, Tiyatila, ne Pelegamuma, ne Simulina, kabiji ne Efisesa. Nkulo ya kipwilo, ayo Yesu yo aambile mba, “Inge—inge Musongoshi waiya mu kimye kitanshi nangwa mu kimye kya butanu na bubiji, abye byonse bisungu byabuka.” Bajinga. Babuka, bisungu bya mu Efisesa, Simulina, Pelegamuma, Tiyatila, Saladisa, Filadefya, kabiji ne Laodikeya. Bushe mwamona kyokyo nyi? Kyajinga mu nkulo ya butanu na bubiji, po aishile Aye na kubusha bisungu byalala. Akyo kibaleta bonse bo kufumatu kunyuma *kokwa*. Mwamona? Mambo, mu kikye, kupita mu myaka, mankulo, Aye washimika Musongwa, wasemwa Musongwa, wasemwa Musongwa panopantanda namambo a Kilishitu. Kabiji mu jishindatu jimo Aye jo asemenamo Musongwa, Aye jo asemenamo umo umo.

⁹⁶ Pano Mbena kubwezha kikye lunyuma, pakuuba mba mwakonsha kumona kilota kya nyenga umvwe kyalondololwa.

⁹⁷ Pano, abye bintu kine byafwainwa kwikala mu Mwinakilishitu kasa akyangye kubikwapo tutetesho ku Mupashi Wazhila ne, akye kasa kikyanygye kwiya peulu na kulenga kintu kyapwijiijika ne.

⁹⁸ Pano, kiloto kya nyenga yetu. Aye wajinga wasakamana kana wajinga na Mupashi Wazhila nangwa ine, byo alajile pamwanya apo balume banji byo batangilenga pepala. Kabiji uji na babacheche, nobe byo Nji nabo, kabiji kimye kyonse booba kyongo ne bintu bikwabo. Kabiji nanchi, mu kikye, waponene mutulo pepi nobe mamineti teeni, nangwa fifitiini. Kabiji walotele. Kabiji kechi wikikwatakenye ne, nangwa kwikumvwisha kyonse ne, mwaka umo wapwa, pepi byonkabyo, poso aye Mbila byo yafunjishiwe. Nanchi, kimye Amiwa kyo Nafunjishenga, po kyabwelele kwi aye. Kabiji walotele mba ubena kulomba.

⁹⁹ Aye waedelenga mu nzubo, kasa akyangye kulota patanshitu, wazhondelenga maboko anji, kasa alanguluka mba, “Nkambo, Amiwa njina Mupashi Wazhila? Mwakonsha kushinikisha kwi amiwa. Mujishinda jimo, ‘Mambo akuuba

mba—mba Nabijikilenga.’ Nangwa bamo baambile mba, ‘Mambo Naambile na jimi.’ Kabiji twaketekela mu byonse byo. Bino Amiwa kine Njinanji?”

¹⁰⁰ Naketekela mu byonse bye bintu, bya kufikilamo, kwamba mujimi, ne kubijika, kabiji ne misango yonse ya byakumwesha. Naketekela mu byonse bye. Bino inge kiji konka kwabula *Kikye*, kechi pajipo kintu kimo kyatama ne. Mwamona? Pano, monai, mwamona, anweba—anweba muji na kibabulwa. Monai.

¹⁰¹ Kabiji wajinga wasakamana pa kikye, nanchi aye walajiletu pamwanya apo mulume wanji po atangilenga, kabiji waponejile mutulo.

¹⁰² Kabiji walotele mba uji pa mutumba. Kabiji mu yuwe mutumba, ye nawamisha. . . Amiwa kechi njina kipepala ku meso ami ne, bino Nalanguluka mba kiji bibye. Aye walotele mba wamwene ki—ki bokoshi kya jibwe, nobe—nobe—fulemu, waikala peulu ya yuwe mutumba. Kabiji mulume wanji wajingatu kunyuma yanji. Kabiji wamwene mwanamulume mukatampe waimene popa, kasa amvwala bya kwingijilamo, wapiipa ne maboko, watapwilenga meema atoka bingi o akyangye kumonapo, na kwitulwila mu kikye kibokoshi akye kibokoshi kyajinga peulu ya mutumba. Kabiji akye kibokoshi kya jibwe kechi kyalaminenga meema ne. Kabiji kyaalumukile kufuma popa, ne kusungulula yonse ndochi ne sala, kabiji ne bintu byonse byajinga popa, kabiji byasungulukile ne kukulukila mushi ya mutumba. Kabiji alumukijile kushi ya mauulu anji, kabiji aye waimene mu byobya bintu, bino kechi byalamachijile kwi aye ne.

¹⁰³ Kabiji—kabiji pano waipwizhe kika kibokoshi kyakakelwe kulama meema, ne mwanamulume waambile mba, “Aa kechi meema ne. Awa ye Mupashi Wazhila, kabiji,” waambile mba, “kafwako nangwa kimo Kyakonsha Kumukanya ne.” Kabiji waambile mba, nanchi wabwelele na kutola mbekete ikwabo, kabiji yajinga yayula buki, kabiji waitulwijile buki monkamwa, na kwamba mba, “Pano kyakonsha kulama bibye.” Kabiji aye walangulukile mba akya kyajinga kibokoshi, amba kyajinga kibokoshi kya jibwe, kyafwaijilwe kulajika ne kwichila buki, nangwa byonkabyo kechi kyaubiwe ne. Pakupezhako kyalamachile pamo ne kwikwata.

¹⁰⁴ Aye waalulukile ne kukulukila mushi ya mutumba. Byo akukulukilenga mushi ya mutumba, waimene kushi ya mutumba ne kutala konka ko afuma. Aye wamwene tukola faivi twa aao atoka, meema akilishitala, abulamo biko bya bintu mo apichile, ajingatu atoka abulamo biko, abena kwiiya lubilo lubilo. Kabiji abwela atatula kwenda bitende bitende. Nanchi, byo kyailenga na kukeepana, kabiji watatwile kukumya kana akonsha kufika panshi ya mutumba, aya mikola faivi. Kabiji wabukile.

105 Naketekela mba akyo kijitu pepipepi kwikala bulongo, kechi ibyo nenyi, Nyenga Shepherd?

106 Pano, kasa Nkyangye kunshiikula kalata ne kwiyiishikula ne, Amiwa kasa kyangye kutanga ne, Namwene kiloto kyanji.

107 Abyo biloto byo bilumbululwa. Pano, anweba bavula mwaiyapo kwi amiwa na biloto, kabiji—kabiji ne kwamba bintu kwi amiwa pa biloto. Ng’amba mba, “Pembelaiko mineti umo. Anweba kechi mwikibulang’ene kyonse ne.” Mwamona? Kabiji nabwela ne kitola. Nanchi inge wabula kubulang’ana kyowalotele ne, wafwainwa kuyuka byepi kilumbululo mba kiji bulongo nangwa ine? Mwamona? Wafwainwa kuuba, wafwainwa kumona kiloto. Kimwesho kyafwainwa kumweshwa kiloto. Kabiji inge mwamona kiloto awa muntu kyo alotele, kabiji wakonsha kubulang’ana kasa bakyangye kukubuula ne, apa nishi wayuka kilumbululo.

108 Kyawama, Naketekela mba akyo kiji mu Kinembelo, ne akyo, Danyela, kimye kimo. Kechi ibyo nenyi? Waambile mba. . .Ee. Naketekela mba Amiwa nalangulukile pa kyokyo. Mwamona?

109 Bino kimye kyonse umona kiloto, pano, kana kilumbululo kiji bulongo. Muntu watatula kukubula kiloto, wakonsha kwibakanya, kwamba mba, “Pembelaiko mineti umo. Kabiji kyajinga *kikananga-ne-kikananga*. Kyajinga *kikananga-ne-kikananga*, kubikapo *kikananga-ne-kikananga*.”

Kabiji pano waamba mba, “Akyo kine kiji bulongo.” Mwamona?

110 Muntu umo, juba jikwabo, wakebelenga kumbula kiloto kyo alotele. Aye waambile mba, “Kyawama,” waambile mba. . .

Naambile mba, “Pano, mulongo, kika kyo washilapo lolwa lubaji lukwabo?”

Aye waambile mba, “Lubaji lwepi lukwabo?”

111 Naambile mba, “Obewa walotele wataya jibwe mu mwela, kabiji Amiwa ne jilozele ne bimo byangiile mu jiso jami.”

112 Aye waambile mba, “Abo kine bukine, Mulongo Branham.” Bino abo batolakotu lubaji lwakyo lwapelako, keesha. Uu-uu.

113 Nanchi byobyoyo kiji. Mwamona? Mwamona? Kika? Anweba kechi mubulang’ana bukine bwa kikye ne, bino, mwamona, Kimye kyonse kisolola bya kunyuma, kika, ukemubuula kiloto kyobe, byo walotele. Nanchi mwayuka mba kijitu bulongo.

114 Pano, kino kyo kilumbululo kya kiloto kyanji. Aye wakatazhiwe muchima na Mupashi Wazhila. Pano, monka mo amwenejile kibokoshi peulu ya mutumba, kyajinga jibwe. Kibokoshi kya jibwe, ke *jibwe*, “kwisolola.” Pano, nobe Yesu byo aambile mu Kinembelo. Aye waambile mba, Petelo waambile mba. . . “Ing’anyi,” Yesu waambile mba, “bantu bamba mba Amiwa yami ng’anyi, Mwaana muntu, byoji nyi?”

“Umo waambile mba Anweba mwi ‘Elaija,’ kabiji ‘Mosesa,’ ne bikwabotu.”

Kabiji Aye waambile mba, “Pano Anweba mwamba mba Amiwa yami ng’anyi?”

Aye waambile mba, “Anweba yenu Kilishitu, Mwaana Lesa mumi.”

115 Bino, bantu bamo baamba mba, kipwilo kya Katolika kyaamba mba, kipwilo kya Katolika waku Loma kyaamba mba, Kwanji kwiso- . . . “Aja jibwe jajinga, jo aambile Yesu mba, ‘Pa jonka jino jibwe po Nkatunga Kipwilo Kyami, kabiji bizhilo bya kalunga kabafu kechi bi Kekishinda ne.’” Baambile mba, “Kyajinga pe Petelo. Kabiji Petelo wajinga joja jibwe, mambo *Petelo* kyalumbulula mba ‘jibwe jicheche.’ ‘Pa jonka jino jibwe jicheche Po nkatunga Kipwilo Kyami.’” Kabiji ponka pe Petelo, abo, pa buswanyi bwa batumwa, po bashimikijile kipwilo.

116 Nanchi kipwilo kya ba Polotesitati kyamba mba, “Akyo kyatama. Amba, kyajinga pe Ayemwine po Ashimikile Kipwilo.”

117 Pano, kechi kupachika ne, bino, Ami, mwayila kumona kwami, byonse bibiji byaya mungi. Mambo, aye kechi Wikinshimikile pe Petelo ne, nangwa Aye kechi Wikinshimika pe Aye mwine ne, bino kiji pa lumwekesho lwa kwa Petelo lwa kwamba mba Aye Yeng’anyi. Mwamona?

“Bantu baamba mba, Amiwa Mwaana muntu yami ng’anyi?”

“Anweba mwi Kilishitu, Mwaana Lesa mumi.”

118 “Mwatokwa anweba, Shimona, mwaana Yona. Mubiji wa nyama ne mashi kechi yewimusolwela kikye ne,” sukuulu umo ne, monai, “pakuuba Ba Taata banji Mwiulu bobemusolwelakyo. Anweba mwi Petelo. Pa jonka jino jibwe ja kwisolola, palulwe lumwekesho, Amiwa po kanshimika Kipwilo Kyami.”

119 Kabiji kyajinga, kila nkulo ya kipwilo yajinga na joja jibwe ja kwisolola, kufikatu ne kukwisolola kwa ku Laodikeya.

120 Kabiji, pano, obewa kechi wakonsha kulenga kipwilo kyazhila ne. Kechi kujipo kintu kya yeo musango mba ke kipwilo kyazhila nangwa kabungwe ne. Aye Mupashi Wazhila wafwainwa kusapwilwa mukachi kakyoo, bino amwa mukachi mukatanamo bawama ne batama, bayubilo bingi, bapusanako, kabiji ne byonse byashala. Nanchi kabungwe kechi kakonsha kukwachijila ne. Anweba kuuba mwaamba mba, “Tuji Nakyo ne. Kafwako nangwa umo wa mwiabo uji Nakyo ne.” Ine, mwane. Aye Mupashi Wazhila upewa pa muntu pa muntu. Ke pa muntu bunke.

121 Nanchi, onkao mambo, jibwe, akye kya juba-japelako, Kipwilo kya pentekosito kyatambula Mupashi Wazhila, abo bekyubile patanshi. Kupita mu mankulo onse, batambula Mupashi Wazhila, bino kechi pa kipimo kyo baji Nanji luno ne, mambo ke kubwezhiwa kwa kitanshi. Byo tutola

bitulwapo malapi, Alufa ne Omega, byo baambwile kandulu katanshi; kyailengatu peulu, kabiji kyatatula kubwelatu panshi; kabiji kyabwela jibiji. Mwamona? Kitanshi ne kyapelako, ne bikwabotu.

¹²² Pano, bino mu ino nkulo ya kipwilo, Mbila ibena kwitulwila mu kipwilo. Pakuuba kipwilo mubiji, akyo kine, kiji pamo nobe. . .

¹²³ Uno tabbanako, byo tusa kwamba. (Ako iko ko eya ku kipwilo.) Uno tabbanako kechi ke Mupashi Wazhila tabbanako ne. Kechi kujipo kintu kya musango yeo ne. Umo umo wiya ku kino kipwilo o matabbanako a Mupashi Wazhila. Ke matabbanako mwaikala Mupashi Wazhila, bino kechi kipwilo mu mubiji ne, ke jibumba. Onkao mambo, Kifumamo.

¹²⁴ Bino, kika, awe muntu waitulwilenga meema, muluwe ku kipwilo, na kwitulwila Mbila mu kipwilo, pano meema aubilenga ka? Kyabijilenga na kufumyamo biko byajinga monka. Abya ibyo Mupashi Wazhila byo ooba, ubizha na kwibilupulamo, pankapano.

¹²⁵ Pano, buki kyaimenako butemwe bwa balongo, butemwe bwa balongo, ayo yo ino nkulo. Amiwa napwisha na kubulang'ana, monai, pa butemwe bwa balongo, yo nkulo yo tubena kwikalamo.

¹²⁶ Pano, mwakonsha kwamba mba, "Talai, Ami—Ami—Ami kine kechi natemwa Mulongo Neville ne." Nangwa mba, "Amiwa kine kechi natemwa Mulongo Jones ne. Amiwa kechi natemwa Mulongo *Kananga-ne-kananga ne*," kintu kimo kiji nobe byo. Bino lekaitu kintu kimo kimweke kwi aye, mulongo, muchima obe wa abanapo. Pepitu ku kwipaya. Mwamona? Twafwainwa kutambula butemwe bwa balongo ne kwikala na kebelo ya umo ne mukwabo. Mwamona? Bino pakuuba mba mutwajijile mu jibumba ja bantu. . .

¹²⁷ Kika kyo watelako muchima ku yewa mulongo? Mambo obewa watebaula naji shinkwa kuno ku kitapisho, byonka byo musakuuba bufuku buno. Anweba muji nanji mu lumvwang'ano lwabupopweshi. Anweba mwaimwine maboko anji. Anweba mumpopwela nanji. Aye ke mulongo obe. Kabiji wafwainwa kubapo kintu kimo ku mubiji, kyakuuba mba mwakonsha ne kwipachika naji, mambo anweba mwikalatu, (akyō kyo mwafwainwa kubula kuuba), bino wamunyema pacheche. Pakuuba mukachi ka muchima obe, inge kintu kimo kyamweka ku yewa mulongo, kyafwainwa ku kwipaya, nangwa yewa nyenga.

¹²⁸ Amiwa—Amiwa ne mwanamulume mukote. Kimye kimo najinga mwanyike, kabiji pano Amiwa ne mukote. Amiwa ne kimona, kupita mu nkulo, na kuuba kyokyo. Umvwa bantu baamba mba, "Amiwa kechi kekalapo na mwingilo wakwingila naji ne." Kabiji kintu kimo kyamweka ku yewa muntu, kikalatu

pepi ku kwipaya. Aye ulanguluka mba, “Anweba Lesa, Naleka mulongo wami wawama waya, kwakubula kwikala bulunda ne aye ne.” Mwamona? Mwamona? Mwamona? Ke butemwe bwa balongo. Kimwekatu nobe kechi kyakonsha kulamachila ne, bino bulamachila. Abo buki, bulamata.

¹²⁹ Pano, kyakuuba mba wafuma kokwa, mushi ya katumbatumba, kufika ne panshi ya katumbatumba, pano, ao meema awama alupukilenga peulu ya katumbatumba, mu tukola faivi. Pano, faivi ke nambala ya bupe; Y-e-s-u, l-w-i-t-a-b-i-l-o, b-u-p-e. Mwamona? Faivi ke nambala ya bupe. Mikola faivi ya itulwilenga kupita mu mufolo, kupita kuya *kukwe*.

¹³⁰ Kila imo yaao mankulo yajinga na jibwe ja kwisolola. Abo bazhijikwa balala, na kupembelela, na kupembelela, na kupembelela, na kupembelela, monai, poso kufika mu ino nkulo. Pakuuba Mupashi Wazhila, byo etulwilwa kufuma kwi Kilishitu, ukeya na kubika katetesho ka Kipwilo. Apa bino Kipwilo po kikashikulwa. Kikekala ke kintu kyapwijijika kukwatakana kya Lesa, Musongwa wa Kilishitu, ao ukekala Mutwe wa bintu byonse. Pano mubena kundondela? [Kipwilo kyaamba mba, “Amena.”—Waku.]

¹³¹ Pano, aye wakuminye. Pano, mukiloto kyanji, aye wakuminyenga, “Bushe ako kakola kacheche... Bushe ako kakola ka kacheche kafwainwa kufika panshi ya mutumba?” Mwamona? Kajinga kabena kuuma meema. Pano, byokiji mba, aye mwine. Pano kino kyo Mbena kukeba mba obewa uyuke pakino kimye. Aye mwine wakuminyenga namambo a aye mwine. Kana aye “uji na Mupashi Wazhila”?

¹³² Pano, Amiwa kaana kwamba kikye, moba acheche apitapo, kasa ndanguluka mba kipwilo kyafwainwa kwikala kya bumupashi mu kukwatakanya kikye. Kabiji kape kyangwamina kuzhimya yuwe tepu ponkapano, mambo kechi Mbena kukeba abye bikaye mu balongo ne. Bino wakonsha kwamba na jimi, wakonsha kubijika, wakonsha kuzha, wakonsha kupangamo bademona, kuuba kintu kyonse kyo ukeba kuuba, bino kasa wabula Mupashi Wazhila.

¹³³ Bushe aba banababwanga kechi babwelele jibiji, na kusangalala ne kubijika mambo bademona bebanekenejile, kabiji Yesu. . . monka mukachi kabo mwajinga Yudasa?

¹³⁴ Bushe Yesu kechi waambile, “Mu joja juba,” byo Aishile, amba, “bavula bakeya kwi Amiwa ne kwaamba mba, ‘Nkambo, kechi Napangilemo bademona ne, kabiji mu Jizhina Jenu naubijilemo mingilo ya bulume?’ Kabiji Amiwa kebambila mba, ‘Mfumai Amiwa, anweba bakuba bibi. Amiwa kechi ne muyukilepo ne.’” Abyo bintu kechi tuyukile twa Mupashi Wazhila ne.

“Ko kubipangwa byabo ko mukebayukila.”

¹³⁵ Pano mwaamba mba, “Mulongo Branham, bushe atweba, twafwainwa kwamba na jimi nyi?” Kine. Abyo ke byabupe bya kwa Lesa. Bino abya byabupe bya kwa Lesa, kwakubula kukwe kulumbuluka mwi abo ne, kikala ke kyakwitutulako waitabila. Kechi kyaswishiwa kwi Lesa ne.

¹³⁶ *Abye* byafwainwa kwikala bitanshi. Kabiji umvwe uji na lwitabilo, bulume, maana, kwikanya, butekanye, bulesa, kabiji ne butemwe bwa balongo, apa bino Mupashi Wazhila waiya wakubika katetesho nobe wakwatakana pamo, kijitu pamo nobe Aye byo abika katetesho mankulo a bipwilo. Jishinda Aye jo alengelamo Musongwa Wanji jo jishinda Aye jo alengelamo muntu bunke; walengwa ku bintu bimo, nobe Eva byo alengelwe kufuma kwi Adama, lubavu kufuma ku lubaji. *Abye* byo bintu byo wafwainwa kwikala nabyo patanshi. Obewa kechi wakonsha kwibipashang’anya ne. Obewa kechi wakonsha kwibisombolola ne. Byafwainwa kwikala byatumwa-na Lesa kabiji byasemwa-kwi Lesa. Kusombolola kuletatu kivundakanya.

¹³⁷ Kijitu pamo nobe byo Naambile. Mwakonsha kulanguluka kumona uja bifwila waikala popa na jiyona ja nkunda jiji mu byapi byanji, ne kwamba mba, “Monai, Amiwa ne nkunda!” Aye kechi ke nkunda ne. Aye uja bifwila, kikwangala. Mwakonsha kulanguluka ng’onyi ufitu uji na mayona a nduba mu byapi byanji, kabiji ne kwamba mba, “Mwamona!”? Akyo ke kintu kimo kyo aikalamo.

¹³⁸ Bino kyafwainwa kufuma mukachi kulupuka pangye, kabiji kileta Bwinakilishitu; Lesa, na bulume bwa Mupashi Wazhila!

¹³⁹ Nyenga yetu maulu anji atalala byo afikile munshi. Atweba bonse twamuyuka Nyenga Kafunga kwikala upana bukwasho. Nzubo yanji yakyashi. Aye ne mulongo, Amiwa kechi natako muchima ne nangwa kileya, kalomba, musango yense mokyakela, abo bakamujisha, booba kintu kiji kyonse kyo bafwainwa kuuba mu kupana bukwasho. Oo! Lesa waswile kyokyo, lubaji lwa kintendekesho kyanji.

¹⁴⁰ Kabiji uji bino, pano, umvwai lulwe lufunjisho. Akino kyo kyatama na—na... Nanshikwila kikye. Akino kyo kyatama ku Branham Tabernacle. Mwamona, kuji misango ibiji ya lwitabilo. Kuji misango ibiji ya bulume yapusana, nobe byonka byo Najinga nakyo juba jikwabo. Misango ibiji yapusana ya maana. Misango ibiji yapusana ya kwikanya.

¹⁴¹ Umo ulanguluka mba bekikanya, baji nakyo. Aao kechi ye musango wa kwikanya kwa Lesa ko abena kwambapo ne. Ke kyokya kyabula bulesa, kuzhingila kwatama ko uji nako, kabiji ne bintu biji ku lolwa lubaji, bya kwamba amba, byakupachika.

¹⁴² Butekanye, ne bikwabotu, kuji byakwijimbaika, kufwanyikizha kwikala byo byo; lwitabilo lwa kisemwa-lwaapewa; bulume bwakisemwa-bwapeewa. Kuji musango wa

kwikanya wa kisemwa-kyapewa. Byonse bye bintu byapeewa na kisemwa.

¹⁴³ Kabiji lubajin lwa baya lwa lwitabilo lwetu ke lwitabilo lwa bumuntu. Pa kumvwa Kyambo, kituletela kuyuka Lesa na maana a bumuntu.

¹⁴⁴ Pakuuba inge Kikye, kyafuma Mwiulu, oo, mulongo, inge Kyafikila *pakikye*, kuji lwitabilo lwa bumupashi. Nanchi alwa lwitabilo luuba byepi? Alwa lwitabilo luyukatu Kyambo. Nangwa kikale byepi kyaamba muntu uji yense waamba, kiyukatu Kyambo, mambo, “Muntendekelo mwajinga Kyambo, ne kyokya Kyambo kyajinga na Lesa, kabiji akya Kyambo kyajinga Lesa.” Kabiji akya Kyambo kikijitu Lesa. “Kabiji akya Kyambo kya alwilwe ke muntu ne kwikala waikelenga muno mwetu.” Kabiji umvwe Kyambo Akyokine kibena kwitulwilwa mu lwitabilo lwetu, lwitabilo lwetu lwikala ke lumwekesho lwa bumupashi.

¹⁴⁵ “Kabiji pa kikye kintendekesho Amiwa po nkashimika Kipwilo Kyami.” Mwamona? Kechi mwayila ndangulukilo ya kwinunga ku kipwilo ne, ndangulukilo ya bumuntu ya Kyokyo; kana ponka pa lumwekesho, inge atwa tukola twa bupe twayitulwilwa mu lwitabilo lwa bumuntu lo uji nalo. Nanchi, poka pa kikye, ke lumwekesho lwa bumupashi, “Amiwa nkashimika Kipwilo Kyami, kabiji binzhilo bya kalunga kechi Bikekishinde ne.” Mwamona? Akya kimwesa mba aba Bekishikwa, bino kechi kikashinda ne. Oo, ke kintu kyawama bingi! Pano monai lwitabilo. Atwe tukola faivi . . .

Najinga na kipimvwa kya choko kuno, bino Naketekela mba kechi wamuletele ne.

¹⁴⁶ Pakuuba mikola faivi yo wamona na kwikila mushi mumwe, kyakashila *byonse* pamo. Kyajinga Mupashi Wazhila ye walengele kipwilo kya Efisesa. Kyajinga Mupashi Wazhila wasemene kipwilo kya Simulina. Aye Mupashi Wazhila ye wapaine kipwilo kya Pelegamuma, ne kipwilo kya Tiyatila, mu Mankulo a Fishi. Ke Mupashi Wazhila ye washimika yewa Musongwa, Basalululwa bafuma mu nyingijilo ya tubungwe kupita mu mankulo byobya. Kuji Basalululwa, Musongwa watongwejlwe jimo wa Yesu Kilishitu, kyakuuba mba Mupashi Wazhila ye waita Basalululwa. Kabiji kyaikala Mupashi Wazhila mu *ino* nkulo, *muyoya* nkulo, *aya* nkulo, *aya*, *aya*, *aya*, *aya*, kuyatu ne kulutwe, Mupashi Wzhila.

¹⁴⁷ Kabiji pano nobe mu bantu bunke bunke, bibye bya kufikilamo ne bintu bikwabo, ke maana kabiji ne kwikanya, byanungwako ku lwitabilo lwetu. Nanchi inge Jibwe jajikoka jaiya, aye Mupashi Wazhila Wibikwatakanya pamo. Alo lo lubatizhilo lwa Mupashi Wazhila. Oene mambo leelo kyokyaikela kyaipipa.

148 Namona papo, Njina kibaba kyanembwa papo. Twayai tumone. Najinga na kipikichala kyalengwa papo, kya kiloto kyanji. Mwamona? Anweba kechi mwakonsha kwikimona kufuma koko ne.

149 Pano, kufuma ku Mupashi Wazhila, kika kyaiya? Nanchi Aye ukermupa, lwitabilo lwa bulesa, lwitabilo lwa bumupashi, amba *kuno* mushi. Nanchi alwa lwitabilo lwa bumupashi luyukatu Kyambo. Nangwatu muntu mukwabo ambe byepi, kechi—kechi kyakonsha kuubapo kintu kyawama ne. Akya kyayukatu Kyambo. Inge muntu umo waamba mba, “Moba abya kukumya apita.” Alo lwitabilo luyukatu Kyambo. Muntu umo waamba mba, “Kechi kujipo kintu kya kwamba mba lubatizhilo lwa Mupashi Wazhila ne.” Alwa lwitabilo luyukatu Kyambo. Akyo kine, lwitabilo lwa bumupashi, mwamona. Abyo ibyo. Mwamona? Kyayukatu Kyambo.

150 Nanchi, aya yajinga nambala wanu. Nambala wanu, kwiya kwi anweba, lwitabilo lweni lwa bumuntu papo, kwiya kwa Mupashi Wazhila ubena kwiya mu lwitabilo lwa bumuntu, kwilulengela kwikala lwitabilo lwa bumupashi. Nanchi lwitabilo lwa bumupashi luyukatu Kyambo.

151 Pano, kabiji nambala tuu, fiili. Nanchi po ukekala na bumupashi, ukekala na Mupashi Wazhila, kabiji ukabika katetesho pa byonse *bye* bintu mwi obewa, nobe byonka Mupashi Wazhila byo amvweta *bibye*. Kufuma ku lwitabilo lobe, kufika ne ku Mupashi Wazhila, ne kukubika mwi Kilishitu. Nanchi waikala ke Umo. Amena. (Fumyaimo kikye kintu mu jishinda jami; kyakosa mu maboko enu.) Obewa waikala ke umo. Monai, obewa ne Kilishitu kwikala pamo. “Pa joja juba mukayuka mba Amiwa nji mwi Bataata, ba Taata mwi Amiwa; Amiwa mwi anweba, ne anweba mwi Amiwa.” Mwamona? Nanchi akyo ke katetesho ka kwatakanya bintu bya Nkambo Lesa.

152 Pano, kabiji bashinikishiwa ne kwikajikwa. Umvwe akya kimye kyaubiwa, baikala baana bashinikishiwa babalume ne babakazhi bakwa Lesa.

153 Mwavuluka, mu Buuku wa Mateyo, kyapitala kyabu 17, na veeleshi wabu 1 kufika ne ku veeleshi wabu 5, Yesu pa Mutumba Wakwalulwa?

154 Anweba mwaumvwapo *Mumvwai Aye Iye*. Busapwishi Amiwa bo na, kuno pepi nobe mwaka umo wapitapo, nasapwijile, bwaikele bwayukanyikwa bingi, *Mumvwai Aye Iye*. Kwikajikwa kwa mwaana, mu Efisesa 1:5 ne ako, “Lesu witutongwejile jimo amba kebalule ke baana.”

155 Monai, kisemi, inge mwaana wasemwa mwiakyo, ke mwaana pa kyokya kimye. Bino awa mwaana uji na bakumufunjisha ne kumokomesha. Kabiji umvwe awa mwaana wabula kwikala—kwikala musango wa mwaana walumbuluka, aye kechi wikala ke swanyi ne. Pakuuba inge waikala mwaana walumbuluka,

kabiji awa mwaana uji na lukokela ku bashanji, nishi awa mwaana bamwikajika, nangwa kubikwa mukifulo kyanji. Aye wikala ke swanyi wa pa byobya byanonka bashanji.

¹⁵⁶ Kabiji abyo Lesa byobya aubilenga ku Mutumba Wakwalulwa. Kimye Aye kyo atolele Mwaana Wanji Mwine, panyuma Aye washiniikishiwa mba Mwaana wawama, monai, kabiji washijile meseko onse, Aye wamusendele Ku Mutumba Wakwalulwa ne kumunyeng'amina Aye.

¹⁵⁷ Mwayukatu, mu Lulayang'ano Lwakala, basendanga mwaana, bamumvwika kyawama, kyakumvwala kyawaina, ne kumwikajika ku meso a bantu bonse. Kabiji baikalanga na kusekelela kwa kumwikajika, nangwa twikitela mba kwalulwa bubaana. Amwa mu Ngaalatiya, Nalanguluka mba Paulo wikitela mba kwalulwa bu baana. Pano, bino, kwikajikwa bu baana, bamingilo bafwainwa kukwatakanya, ne bumupashi, batanga Baibolo, pa kwikajika mwana wanji. Mu byambo bikwabo, mwaana wajinga mwaana byo asemekelwe.

¹⁵⁸ Apo ipo bantu ba ki Pentekosito po baubijile kilubo kyabo. Kusemwa mu kisemi, kupichila mu Mupashi Wazhila, abyo ibyo, bino nangwa byonkabyo twafwainwa kwikala baana baitabilwa, bafunjishiwa na Mufunjishi waitabilwa. Mwamona?

¹⁵⁹ Pano, inge muntu, kunyuma mu mankulo akala, walangulukile pa mwananji, wamukebele mba ekale mwaana wafwainwa, wasendanga mufunjishi wawamisha ye akonsha kutana, wawamisha mufunjishi, mambo wakebelenga mwananji wakoma waikala byonka biji bashanji. Mwamona? Nanchi wakebanga mufunjishi wawama.

¹⁶⁰ Pano, inge muntu pantanda walanguluka pa mufunjishi wawamisha, pano nga Lesa, Shentu? Bino, Aye kechi watolele ma bishopu, ne makandino, ne mapulisiti ne. Aye watolele Mupashi Wazhila kwikala Mufunjishi. Kabiji Mupashi Wazhila ye Mufunjishi wetu. Kabiji Aye—Aye uji mu Kipwilo, kabiji Aye usenda mbila ku Bataata.

¹⁶¹ Kabiji pano ibyepi inge bashanji, nangwa, mufunjishi waishile ne kwamba mba, “Kyawama, Taata. . .” Pano, aye kechi wakonsha kusenda mufunjishi ukeba mu penede mu kisochi kyanji, mwayukatu, jiyona, byo twikitela. Kwaamba mba, “Oo, inge Nakonsha kubuula bashanji kintu kimo pa. . . Awa nsongwalume mucheche waluwakana, nangwa byonkabyo, bino inge Na—inge Nabuula bashanji, bataata bafwainwa ku komesha.” Awo kechi ye mufunjishi waitabilwa ne. Mufunjishi wawama wikala wakishika, ne kwamba bukine.

¹⁶² Kabiji Mupashi Wazhila ubuulang'ana Bukine inge Waya kumeso akwa Lesa, mambo a atweba. Ee. Nanchi Aye wiya. Mwalangulukapo byepi? Aye wakonsha kupaata ja leelo ne kwamba mba, “Baana benu babakazhi bonse babena kutenda suki, bino anweba mwibabuujile mba kechi mwafwainwa

kwikyuba ne. Baana benu babalume milanguluko yabo-ya bukabungwe, abo kechi bakonsha kumo umo ne mukwabo ne. Abyo ibyo. Kabiji abo babena kwikajika *kikye* pa Kyokya, kabiji *kikye* pa Kyokya.” Nga Aye byo akonsha kupaata! Bino aye Mufunjishi wakonsha kutemwa kwiya na kwamba mba, “Oo, ami! Awa mwaana ke mwaana wakine. Aye ujitu pamo nobe Bashanji.” Oo, Aye wakonsha kutemwa kwamba kyokyo! Mwamona?

Pano Bashanji baamba na bwitote, kwamba mba, “Awe ye mwaana Wami!”

¹⁶³ Abyo kine Lesa byo aubile ku Mutumba Wakwalulwa. Monai, kwamwekele Mosesa ne Elaija. Kabiji Petelo, wasangalele bingi; kya bulesa kyaubiwe. Petelo wasangalala, waambile mba, “Twayai tushimike matabbanako asatu, imo Yenu, kabiji imo ya kwa Mosesa, kabiji ikwabo ya kwa Elaija.”

¹⁶⁴ Kimye kyo akyambilengatu, Lesa wamumvwetele. Aye waambile mba, “Awe ye Mwaana Wami Yenatemwa Monamwena lusekelo. Mumvwai Aye.” Mwamona? Lesa wibikile Ayemwine panyuma yanji, kabiji, “Awe ye Mwaana Wami.”

¹⁶⁵ Mosesa waimejileko mizhilo. Bangauzhi baimejileko buchibishi bwamambo Bwanji. Atweba kechi twakonsha kwikeela ku mizhilo Yanji ne. Atweba kechi twakonsha kwikeela ku buchibishi bwamambo Bwanji ne. Amiwa kechi naipuzha buchibishi bwamambo ne. Nasaka lusa, kechi buchibishi bwamambo ne. Amiwa kechi nakonsha kulama mizhilo Yanji ne, kabiji kechi Nakonsha kukumanya buchibishi bwa mambo Bwanji ne. Bino Amiwa mbena kukeba lusa Lwanji. Kabiji Lesa waambile mba mizhilo ne buchibishi bwamambo byasambakena mwi Aye. “Aye ye Mwaana Wami ye natemwa. Mumvwayi Aye. Awa Iye. Awa ye Iye.”

¹⁶⁶ Pano, mu Lulayang’ano Lwakala kimye awa mwaana byo aikajikilwe, nangwa kwikajikwa mu kisemi, jizhina janji jajingatu jafikilamo pa cheki byonka byajingatu ya bashanji. Ee, mwane. Abo kechi bajinga na . . . Bajinga na lingi, aa moba, ki—kiyukilo, kayukilo. Kabiji bajinga . . . [Mulongo Branham wauba kyongo kyakushipa mate ne kupuma pa pulupiti—Waku.] Shipilapo mate, kikajike, mwajinga kiyukilo. Akya kyajingatu kya . . . Aye wamvwajile lingi wa bashanji, kiyukilo kyanji. Kabiji akya kyajingatu pamo nobe kya bashanji.

¹⁶⁷ Pano, kimye Yesu kyo ajinga walukokelo, Yesu kwi Lesa, Lesa Wamubikile mu kifulo kyanji, “Awe ye Iye.”

¹⁶⁸ Pano, inge membala wasemwa ku Mupashi Wazhila mu kisemi kya Lesa kabiji washinikishiwa kwikala na bubwe bulume mwi aye, kyakuuba mba Lesa wakonsha kumona bulume, maana, kwikanya, butekanye, butemwe bwa balongo, ne bulesa, mwi aye, apo Lesa po umubika katetesho, nangwa

ku mwikajika. Kabiji, momwa, popo mwakonsha kumona baana babalume ne babakazhi bakwa Lesa.

169 Nanchi, Efisesa 4:30 waamba mba, “Kechi mumufichishe pa muchima Mupashi Wazhila wakwa Lesa ne, mo monka mo mwabikijilwe katetesho ka kufika ne ku Juba ja bukuzhi bwenu.” Pano, anweba bamo ba Baptist abo babena kukeba kuya pa bukikizhi bwa Peenape, pano, inge mwakonsha kwiya ku yoya tampulo, Amiwa nkemana ne anweba mu bukikizhi bwa Peenape, inge mwakonsha kufika ku kyokya kifulo.

170 Bino kwamba mba, muntu yense waamba mba, “Amiwa natwela mu kipwilo kya Baptist. Amiwa ne Presbyterian. Amiwa njina bukikizhi Bwapeenape.” Akyo kyatama. Bumi bobo bushinikisha mba kechi uji Nakyo ne, poso Kikye kyaikalako.

171 Kabiji Lesa wakwalula ke mwaana ne kukubika katetesho ka Mupashi Wazhila mu Bufumu Bwanji, nanchi kechi kuji kufumamo ne. Obewa wakikizhiwa Peenape. Naketekela. “Kechi mumufichishe pa muchima Mupashi Wazhila wakwa Lesa amo anweba bonse kabiji ne bulume bwenu bwa bulesa mo mwabikilwa katetesho poso kufika ku Juba ja bukuzhi.”

172 Naketekela mba kuji Musongwa watongwelwa jimo. Naketekela mba Lesa waambile mba Ukekala na “Kipwilo kyabula jitomya ne mafunye.” Naketekela mu kutongwelwa jimo, amba Musongwa watongwejiwe jimo. Aye wafwainwa kwikala Konka. Naketekela mba Amiwa nji Nanji. Amba, monai, Amiwa nji Nanji. Pano kiji kwi amiwa kwiingijila amiwa mwine lupulukilo na Lesa, poso *abye* bintu byaitabilwa na Lesa, kabiji ne kubikwa katetesho ka mu Bufumu bwa Lesa. Kuji Mupashi Wazhila. Kuji mingilo ya kishika ya kwa Lesa. “Wabikwa katetesho poso Juba ja bukuzhi.”

Akya kyajinga kiloto kyanji. Nalangulukile mba kyajinga kyawama.

173 Pano, onkao mambo, inge Aye wauba kyokyo, inge akya Kipwilo kyafika pa kikye kifulo, nangwa muntu bunke, Kipwilo kikekala Konka. Lekai ne kyambe bulongo pakuuba mba anweba mwikitambule. Akyo Kipwilo kyangwelwa jimo kwikala Konka. Amiwa nakeba kwikala Nakyo, bino jishindatu Jakwikela Nakyo, ke kwikala Nakyo. Nakonsha kwikala byepi lubaji Lwakyo? Ponka pa kwikala Mwiakyo. Nakonsha Kutwelamo byepi Mwiakyo? Konka ku lubatizhilo, konka ku Mupashi umo. Kolinda Mutanshi 12, “Konka ku Mupashi umo atweba bonse twabatizhiwa mu Mubiji umo.” Mubiji Umo; ne kubatizhiwa mwi Aye.

174 Bino kechi wakonsha kukosela bibye bintu bya bicheche, ne kwamba mba, “Naambile mu jimi. Amiwa nji Nanji.” Obewa waya kukwe, ne kuzhingila, ne kuchipa, ne kutwajijila. Mwamona? Ako ke kubika mayona a nduba ku—ku kasosa.

Mwamona? Kuuba mwikyuba ne. Bumi bobo bushinikisha amba kechi byo kiji ne.

¹⁷⁵ Pakuuba umvwe abye bintu bibena kwingila mwi obewa, na Lesa, nanchi obewa wabikwa katetesho. Nanchi kechi pajipo kyakubikapo-peulu ne. Obewa wi obewa mwine. Apo ipo bimwesho, byalumbuluka, Mupashi Wazhila, mingilo yakwa Lesa, bintu byonse, byasololwa, mambo (kika?) obewa ne Kilishitu mwaikala ke umo. Naketekela mba akyo kyaumvwanika. Anweba ne Kilishitu mwaikala ke umo.

¹⁷⁶ Najinga na kintu kikwabo kyo Nanembele papo, Nakebelenga kulangulukapo. Kituleta ku kifulo kya Bumi. Nanchi waikala . . . waikala na Bumi Bwapeenape.

¹⁷⁷ Pano, Amiwa njina buuku wa ki Ngiliki papo, *Aye Efatiki Diyaglotti*. Nafunjile juba jikwabo pa kyambo.

¹⁷⁸ Pano, mu Yoano 14, nangwa Yoano 3:16, twatana mba, pantu pamo paamba mba, “ikalai na Bumi *bwa myaka*.” Pantu pakwabo po kyaamba mba, “kwikala na Bumi *Bwapeenape*.” Pakuuba mu Kigiliki, mu buuku wa Kingiliki . . . Monka mu Kihebelu, kyaamba mba, “Bumi bwabula mpelo.” Mu kyambo kya Kingiliki, muji a-i-n-i-o-a-n.

¹⁷⁹ Kijitu pamo nobe “*aeon*.” *Aeon* ke “kimye” akyo kibula, ke nambala ibula kubalwa. Kyakila pa mamilyoni, matililyoni, bbilyoni.

¹⁸⁰ Bino akye ke *aionios* wa kimye, Bumi Bwapeenape. Kabiji kyambo kya Kizungu ke Peenape. Twayuka mba kiji na Peenape, *aionios*, nangwa “Bumi bubula kupela ne.” Mwamona? Kabiji inge uji na Bumi bubula kupela, wakonsha konaika? Obewa waikala lubaji lwa Peenape. Kabiji kujitu kintu kimo kiji Peenape.

¹⁸¹ Satana kechi uji Peenape ne. Ine. Aye—aye waikele Satana. Ngehena kechi Peenape ne. Ngehena yalengelwe. Kechi iji Peenape ne. Kabiji aye mibiji kechi ya Peenape ne. Yalengelwe.

¹⁸² Pakuuba Mupashi wakwa Lesa ye Peenape. Kechi wajinga na ntendekelo ne, nangwa kechi Uji na mpelo ne. Kabiji jishindatu ja kwikelamo na Bumi bwa Peenape, kufuma ku kyokya kyambo kya Ngiliki, *Zoe*, kyalumbulula mba, “Bumi bwa Lesa,” tuji, twikala ke lubaji lwa kwa Lesa kimye kyo twaikala baana babalume ne babakazhi bakwa Lesa, kabiji tuji na *aionios* Bumi. Nanchi lubaji lwikala na bumi, alo luyuka kikye Kyambo, kufuma *kuno* kuya *kokwa*, alo luyuka, ke *aionios* Bumi, “Bumi bwakubula mpelo.” Ke Bumi bwa Lesa Ayemwine mwi atweba. Amena. Yii!

¹⁸³ Juba jikwabo, pa lwendo, Najinga na misambo, na Kamonyi wa Yehoba. Bino, kechi kulengululapo luketekelo lwa uji yense ne. Tuji na bavula baitabizhiwa baikala muno, kufuma ku ba Kamonyi ba Yehoba. Umo waketekelwa wetu wa kipwilo

wajinga Kamonyi wa Yehoba, *wajinga*, kabiji wa mpulukile, aye ne kisemi kyanji. Bashanji bajinga ba kutangijila; Mulongo Wood ne abo. Bonse balongo banji ne banyenga, pepi nobe bonse baiya, batambula Mupashi Wazhila, mambo a bimwesho bya Lesa bibabujile byo baubile. Kabiji ne byo. . . Mwamona? Akya kyo kikyubile.

¹⁸⁴ Pano, bino kuno, Bakamonyi ba Yehoba mu buuku wabo, waamba mba mwela ye mupema ye mweo. Bino, akyo kechi kyakonsha kwikala bulongo ne. Mwela ye mupema kechi ye mweo ne. Inge byo kiji, obewa wi—obewa kimye kimo wi musango umo wa mweo, kimye kikwabo kyalondelapo waikala muntu ungi, wapemena yewa mweo. Monai ko mwafwainwa kwikala. Pano, mwela ke lubesha, kabiji mwela kyo kyo mupema mu myona yenu.

¹⁸⁵ Pano, abo basenda Kinembelo kufumina kunyuma, “Kabiji Lesa wapemene mu myona yanji, kabiji waalukile ke mweo mumi.” Pano, Nakeba kwimwipuzhako kintu kimo. Inge wajinga mwanamulume, musangoka wa mwela ye apemenenga Lesa kasa akyangye kupemena Mwela Wanji wa Bumi mwi aye? Mwamona? Musangoka wa mwela? Aye wapemenenga, muntu mumi. Kyawama, nanchi, inge akya kyaikala byobyoyo, nanchi nyama yense ke mweo mumi, mambo bapema mweo wa bumuntu, kabiji ne mweo wetu, kabiji byonse pamo. Nanchi Yesu kechi wafwajilwe kufwa ne. Kitapisho kya bunyama kyafwajilwe kwikala kyafikilamo. Mwamona? Nanchi, mulongo, bya kwipachika kechi bikemana ne.

¹⁸⁶ Bino Lesa byo aubile, Aye wapemene Mwela wa Bumi Bwapeenape, amena, nanchi po aikele ke muntu wa bumi, mweo wakonsha kubula kufwa. Pano monai. Atweba tusakutwela mu buki, kufikatu ne mu makokola enu. Monai. “Wapemejilemo Mwela wa Bumi Bwapeenape mu myona yanji, kabiji waikele ke mweo Wapeenape.” Mambo, Lesa wapemejilemo, kechi byaubile bilengwa na lesa ne, kana byonka byaubile Lesa, wapemene Mwela wa bumi mu myona yanji, kabiji waikele ke mweo wa bumi.

Pano mwaamba kwi amiwa mba, “Adama wafwile, Mulongo Branham.”

¹⁸⁷ Bino vulukai, Adama kasa akyangye kufwa, wajinga na mwanamukoko wamukujile. Aleluya! “Aba bo Ayukijile jimo, ibo bo Aita.” Aye wajinga na mwanamukoko pakuuba mba ebakule. Aye wajinga kipasha. Adama waponene. Nanchi awa mwanamukoko wanengezhiwe Adama, mambo mu myona mwanji mwajinga kala Muuya wa kwa Lesa Wapeenape, kabiji waikele ke mweo mumi. Aye wajinga mwaana wakwa Lesa.

¹⁸⁸ Kechi muuya wanji ne, nobe kyambo kya kina Africa. Amiwa kechi nayuka kyambo kya Ngiliki byo kiji ne, ponkapano. Pakuuba kyambo kya kina Africa, kyo batela mba *amoyah*,

kyalumbulula mba, “mwela; bulume bubula kumweka.” Banyama bapema amoyah. Bandengamambo bapema amoyah.

¹⁸⁹ Pano kika kyo twafwainwa kulwisha Bumi bwa Peenape, inge awa ye mweo Wapeenape wapemena mwi atweba na muuya? Kika kyo twafwainwa kulwisha Bumi bwa Peenape? Kilubakana jibiji, mulongo. Mwamona? Ke—ke—kechi kyakonsheka kwikyuba ne.

¹⁹⁰ Bino, Lesa, kukijishamo pe Adama, wapemene Muuya wa Bumi Bwapeenape, kabiji aye waikele ke muntu wa Peenape kwi Lesa. Aye wajinga na bulume nobe Lesa. Aye wajinga lesa mucheche. Aye wajinga lesa wa pano pantanda; kechi Lesa wa Mwiulu ne, pano. Lesa wa panopantanda!

¹⁹¹ Kabiji juba jimo baana ba Lesa bakekala ke balesa jibiji. Yesu waambile byobyo. “Bushe kechi kyanembwa mu mizhilo yenu nenyi mba, ‘Anweba mwi balesa’? Nanchi inge anweba mwakonsha kutela booba Bo atelele mba lesa, abo Lesa bo apipwile, mwakonsha kuzhachisha byepi Amiwa, ne kwamba mba, inge Naamba mba Amiwa ne Mwaana wakwa Lesa?” Mwamona? Pano tubena kuya mu kintu kimo kyazhika. Pano monai kikye inge twikifikizha panshi.

¹⁹² Pano, byo baji. Aye pano ke mwaana wakwa Lesa, bino uba kilubo. Aye wayuka mba ubena kuuba kyatama. Pano vulukai, Adama kechi wajimbaikilwe ne. Aye Baibolo byobyo aamba. Mutanshi Timoti 3. “Adama kechi wajimbaikilwe ne, pakuuba mwanamukazhi ye wajimbaikilwe, wajinga mu mizhilulwila.” Adama waendele ne Eva, mambo wajinga mukazhi wanji.

¹⁹³ Pamotu nobe Kilishitu, kechi wajimbaikilwe kwi Satana ne, pakuuba watwelele mu lufu na Musongwa. Aye wayile kwikala na Musongwa, pakuuba mba Aye akule Kipwilo.

¹⁹⁴ Adama wayukile mba waya mungi, nanchi waendeleu ne Eva. Mwamona? Bino kwajinga mwanamukoko wibanengezhiwe, amba bakulwa.

¹⁹⁵ Kabiji baabo banabamikoko, leelo, abo bayukanykijilwe jimo kwi Lesa, kabiji Lesa waita mba, ko aji Mukuzhi. “Kafwako muntu nangwa umu wakonsha kwiya kwi Amiwa ne kanatu Ba Taata bamukoka. Kabiji bonse bobapa Bataata bakeya kwi Amiwa.” Abyo ibyo? Nanchi kuji Mwanamukoko wanengezhiwa, kufuma ku kintendekesho kya inontanda, amo mazhina abo mo abikilwe mu Buuku wa Bumi wa Mwanamukoko. Awa Mwanamukoko wanengezhiwe, pakuuba mba alenge jishinda ja bupe ja muntu yense atwele mu lusanguko, Mwanamukoko wanengezhiwa; mwanamukoko wa kwa Adama, pano monai, byonka Adama byo ajinga na mwanamukoko.

¹⁹⁶ Pano, akyo kyo Kipwilo leelo. Amiwa kechi natazha mu kuuba mba—mu—mu kipwilo ne. Mwayuka kine kintu nyi?

197 Amiwa kechi naamba kikyeye kwikala kya myendeleo ne, kabiji kechi Natazha mukuuba mba kikozhe muntu uji yense ne. Amiwa kechi nji kuno na kuuba kyokyo ne, nobe byonka byo Nelondolola kala amiwa mwine. Amiwa njipano na kupana bukwasho, bino kyo Mbena kweseka kuuba . . .

198 Mwayuka kine kintu nyi? Kine, abye bipwilo kechi bipwilo ne. Kujitu Kipwilo kimo. Amwe ke mwakukokolokela. Mwamona? Ke mwakukokolokela. Amiwa kechi jipo na kintu kimo ne. . . Kijitu bulongo. Bino Na—Nasaka kushinikisha kyokyo kwi anweba, mu mamineti acheche, amba ke mwakukokolokela. Obewa walamata ku mwakukokolokela mwa ki Methodist, kubooba baji mwakukokolokela mwa ki Presbyterian, nangwa ku mwakukokolokela mwa ki Pentekosito, monka mo byailatu. Ee, um-hum. Mwakukokolokela! Mwamona? Obewa kechi wakonsha kuuba. . . Mwamona? Bipwilo ke mwakukokolokela bantu baji na mulanguluko umo.

199 Pakuuba Kipwilo ke Kimo. Kabiji kuuba watwela mu Kipwilo ne. Obewa wasemekwa monka mwi Akyo. Kabiji inge wasemwa Monka, obewa wi membala wa Wakyo.

200 Kijitu pamo nobe kisemi kyami. Naikala mu kisemi kya Branham pa myaka fiifite-fiili. Abo kechi bangipwizhepo amiwa kutwela mu kisemi ne. Kika? Amiwa kechi nafwainwa kwiningako ku kisemi ne. Nasemekelwe Branham.

201 Kabiji obewa wasemwa mu Kipwilo. Pano, abye bikwabo byashala ke mwakukokolokela. Bushe mwakilangulukapo kala pakyokyo nyi? Ee, mwane.

202 Juba jimo Nakupilenga nsono, kabiji Nalangulukilenga mba, kyawama, “Kipwilo kikatampe kya Katolika,” byo bekitela. Nayilenga byonkabyatu, na kukupa nsono.

203 Kabiji Kintu kimo kyangimikile, kwimanatu wakosa, waambile mba, “Kechi utele kyokyo Byobyoby ne.” Nakeketele kuzhokoloka. Natatwile kukupa nsono. Nejikwabo Kyangimikile, waambile mba, “Kechi wafwainwa kwibitela Byobyoby ne.” Waambile mba, “Abya ke mwakukokolokela, nobe baji bikwabo. Akye kechi ke Kipwilo ne. Kujitu Kipwilo kimo.” Mwamona? Abo ke bamembala ba mwakukokolokela, mambo wakonsha kutwelamo mwakukokolokela. Bino Kipwilo kechi wakonsha kutwelamo ne. Akyo Kipwilo, usemwa mwi Akyo. Obewa waikala membala wa Wakyo monka mu Kusemwa kupya, apa bino ke membala wa Kisemi, mulongo nangwa nyenga Mwiakyo.

204 Pano lekai ne mutangile kufuma mu *Efatiki Diyagolotti* mumwe, kintu kimo, kya mu Lumwekesho 17:3, kabiji ne Apokalapusi wa *Efatiki Diyagolotti* papo. Kabiji monai kikyeye, byo kitangwa, kabiji byo—byo kyawaina kwesakanya pamo nakyokyo. Lumwekesho 16, 17. Kijitu bulongo. Pano twayai

tutange papo pa kamineti kamo. Telekai ku kikyeye, bulongo, Lumwekesho 17:3.

*Kabiji umo wa ABA SEBENI Bamalaika bajinga na . . .
SEBENI Michiba waishile waamba kwi amiwa, . . .*

205 Mbena kutanga, kufuma *Mu Lexicon*. “Wajinga na . . .”

*. . . “Iya, Nsakukumweshwa LUZHACHISHO LWA yewa PITE
MUKATAMPE, waikala pa Meema Avula;*

206 Kabiji atweba bonse twayuka mba awe ye Vatican. Apano tuji na *Mwenyi Wentu wa Pamulungu* monka mwa, kufuma ku kipwilo kya Katolika, kwitubuula mba byokiji. Mwamona?

207 Kabiji akye kyapana mukumbu ku kikyeye, waambile mba, “Bino pembelaiko mineti umo.” Waambile mba, “Kuji misango yonse ya mazhina,” waambile mba, “kyakonsha kulenga sikisi aduleendi sikisite-sikisi.”

Naambile mba, “Bino pa mineti umotu.”

Waambile mba, “Jizhina jobe ja konsha kulenga sikisi aduleendi . . .”

208 “Bino,” Naambile mba, “Amiwa kechi naikala pamitumba sebeni, na kutangijila ntanda yonse ne, nangwa byonkabyo, mwamona.” Uu-uu! Mwamona? Abyo ibyo. Mwamona?

209 [Mulongo Branham watanga Lumwekesho 17:1 kufuma ku *Efatiki Diyagolotti*—Waku.]

*. . . nkubule LUZHACHISHO lwa AWA PITE MUKATAMPE, awa
waikala pa Meema Avula;*

210 *Meema*, Lumwekesho 17:15, ke “kuvula ne mabumba a bantu.” Mwamona?

*ao BAMAMFUMU ba PANOPANTANDA ye bauba nanji
bulalelale, kabiji ne abo BEKALA pano PANTANDA
bapendwa BINYU bya bu . . . BULALELALALE bwanji.*

211 Pano kika?

*Kabiji ponkapo aye wantwajile, mu Mupashi, mu
Kiselebwa; . . .*

212 *Awa Efatiki Diyagolotti* pano. Mwamona?

*. . . kabiji Namwene Mwanamukazhi waikala pa
lukinyama musombelo wa wachiluluka, wayula na
Mazhina a Mwenga, . . .*

213 Pano, mu King James, waamba mba, “wayula na mazhina a mwenga.” Pa kakimyetu kacheche, kabiji Amiwa nsakwikitambula kuno, pa mineti umotu. Lumwekesho, wabu 3. Kijitu bulongo, byo byo kiji pano. Kijitu bulongo. Lumwekesho, Natanza kuuba mba 17, kechi 7 ne; 17, pano telekai pa veeleshi wabu 3.

*Kabiji aye wasendele mu mupashi mungyetu: kabiji
Namwene mwanamukazhi kasa aikala pa lukinyama
wachijisha, wayula na mazhina a mwenga, . . .*

214 Abyo Kizungu byo kyaamba. Pakuuba Kingiliki kine kufuma mu *Mu Diyagolotti* kitangwa bibye, mu Lumwekesho 17:3. Telekai.

*Kabiji watwajile, mu Mupashi, mu Kiselebwa; Kabiji
Namwene Mwanamukazhi kasa aikala pa Lukinya—
Lukinyama wa musombelo wachijisha, wayula na
Mazhina a Mwenga, . . .*

215 Apo paji lupusano lwabaya bingi, kufuma ku “mazhina a mwenga” kuya ku “mazhina a mwenga avula.” Kyo kika? Kabiji atweba. . . Pano, aye wajinga:

. . . AYE INANJA BA PITE . . .

216 Atweba bonse twayuka kyokyo. Pano kyookika? [Mulongo umo waamba mba, “Kipwilo kya Katolika wa ku Loma.”—Waku.] Obewa kechi wafwainwa kwikala. . . Kyawama, abyo ibyo, akyo kyakonsha kusenda kipwilo kya Katolika wa ku Loma. Bino aye “wayula na mazhina a mwenga avula,” Methodist, Baptist, Presbyterian, Lutheran, bonse kasa betela abo bene, “bipwilo bya Lesa.” Mzhina a mwenga avula! Lupusano lwabaya bingi pakachi ka “mazhina a mwenga” ne “mazhina a mwenga avula.” Betela abo bene mba, “Kipwilo kya Lesa,” kabiji ne kwimenako ntanda yonse; ne bitupa bya bijilo, ne kutoma, ne kutwajijila, ne bijilo bya mulajilo, ne bintu bikwabo byashala, kabiji ne musango wa bintu byonse.

217 Kujitu Kipwilo kimo. Obewa wasemekwa monka mwi Akyo. Obewa kechi utwelamo Momwa ne kanatu waomvwewa mu Mashi a Mwanamukoko kabiji ne kubikwa katetesho na Mupashi Wazhila.

218 Paji lupusano pakachi ka “mazhina a mwenga” ne “mazhina a mwenga avula.” Mwikyumvwa nyi? [Kipwilo kyaamba mba, “Amena.”—Waku.]

219 Nanjikwikimona lukeelo luno kimye kyo Nabatangenga papo, aye. . . Kwiya panshi, Kintu kimo kyajikumbula mba, “Yanga mu kibamba kyobe. Tola *Awa Diyagolotti*.”

220 Kyawama, ke lukokelotu. Byo byonka. Watwelele mukachi. Kabiji Natolele Lumwekesho 17. Nalangulukile mba, “Kika kyo Mubena kunkebela mba ntange kikye?” Natatwile kutanga. [Mulongo Branham watobanya ku minwe yanji—Waku.] Bukiji bukijitu byo Nafikilepo, “Abyo byokiji.” Amiwa natolele pezulu ne kwikinemba. Naambile mba, “Abyo byokiji.”

221 Pano, babena kukajipila amiwa pa kwambapo pa tubungwe. Ke onkao mazhina a mwenga avula, o betela abo bene mba, “bipwilo bya Lesa, ne bipwilo bya Kilishitu, kabiji bipwilo bya

ba Methodist, ne bipwilo.” Ke bifulo mwakukokolokela, kechi bipwilo ne.

222 Kipwilo Kimo, akyo kyo Kipwilo kya Nkambo Yesu Kilishitu. Kabiji Ye ng’anyi? Ye Mubiji wafyamika wa kwa Yesu Kilishitu ubena kwingila panopantanda, walengwa bumembala bwa bibye bipwilo, ao wafwainwa kwikala membala wa Mubiji wakwa Kilishitu. Obewa wafwainwa kusemwa Monka, kechi kunungakana Nankyo ne.

223 Kabiji kutwela mukachi kakyoy, ke mazhina avuka amwenga, awe mwanamukazhi. Awe mwanamukazhi, bulume bwanji!

224 Kabiji mwamona ponka pano ko bakatwala bantu bonse baji na milanguluko ya pusanako pa bupopweshi, kabiji ne kwibatuma ku Alaska. Anweba mwikimona kyokyo. Byonse byo twaketekelamo byapusanako.

225 Kabiji kyo kika? Kinje, Kinje kya Ntandayonse ya Bipwilo kabiji ba Katolika baji na byabo bya-kuuba mu Vatican, konkakwa, konka ko babena kweseka. Kabiji bonse ba mabishopu, ne bakwabotu, babena kweseka kuswang’ana, mu kulwisha komyunizimu. Kyaalo kyonse kyapanshi kibena kulwisha komyunizimu, kabiji akwe kasa babena kutwela mu Bukatolika.

226 Kijitu pamo nobe leelo. Pano potuji, byonka byo Naambile. Atweba tubena kuya. . . Atweba tujitu pepi kwikala babula mali. Atweba tubena kukongola mali, pakino kimye tubena kutaya mali pa misoko ikapanwa myaka fotiini kufuma jalelo. Apo popo twafika. Ng’anyi uji na mali a ntanda? Kyonka kipwilo kya Katolika. Kyakonsha kupanwa byepi kongole ku United States? Pakuuba mba balame atwe tupanyi twa fwaka ne wisiki ne bintu bikwabo. Kine, bakakongola kufuma kwi abo. Inge bauba byobyoy, nishi bapotesha bubeji bwabo, ponkapotu, ku kipwilo kya Katolika wa ku Loma. Twaikajika byonse. Monai kikye, kijitu patoka, kyaikalatu patoka kukila kutanga pepala wa majashi a byambo. Byo kiji. Mwamona?

227 Abo ke ba Methodist, Baptist, Presbyterian, kabiji ne bikwabotu, kasa betela abo bene mba, “Kipwilo kya Lesa.” Katolika ne byonse bintu bo bubwe bulume bwa kinyama kyayula mazhina avula a mwenga. Nakwitela obewa mwine mba, “Yami. . .” Naambile mba. . .

228 Naile ku kipatela kukwe, kechi papita kimye kyabaya ne, nailenga na kulombelela muntu. Naambile mba, “Tubena kuya ku. . .” Bajinga bamaama. Naambile mba, “Tusakwikala na milombelo ya bamaama.”

Kabiji inetu waambile mba, “Mvweta kipembe.”

Naambile mba, “Obewa kechi wi Mwinakilishitu nenyi?”

Waambile mba, “Atweba twi ba Methodist.”

229 Naambile mba, “Nemusachila. Nalangulukile mba kape obewa wi waitabila.” Nandoosele kipembe kwi amiwa. Mwamona? Nanchi, inge kechi wi Mwinakilishitu ne, akyo kyapusanako. Mwamona?

230 Bino, “Atweba twi ba Methodist,” awo ke mwenga. Aye lukinyama, bipwilo, bitelwa mba bipwilo, kechi bipwilo ne. Lekai mone mba akye kyabikwa pa lekondi. Ee. Abye kechi bipwilo ne. Abyo ke mwakukokolokela. Bantu batwela monka.

231 Bino kuuba mwatwela mu Kipwilo kya Lesa mumi ne. Obewa usemekwa monka mwi Akyo, kupichila mu lubatizhilo lwa Mupashi Wazhila. Kabiji umvwe wabatizhiwa na Mupashi Wazhila, abye byakufikilamo bibikwa bu katetesho mwi obewa, na mu Mupashi Wazhila, onkao mambo, “Aye wasemwa kwi Lesa kechi ulenga mambo ne.” “Kechi wakonsha ne.” Abyo byobyoyo kiji. Oo, ami!

Twambatu juba jonse, kechi ibyo nenyi?

232 Akyo Kipwilo ke Mubiji wa Kilishitu ubula kumweka, wasemwa Muya wa Lesa. Oooo! Mwikyumvwa nyi? [Kipwilo kyaamba mba, “Amena.”—Waku.] Akyo Kipwilo kya Lesa wasemekwa mu Muya wa Lesa. Lesa wapemene Muya mu myonya, mu bumupashi, wakwa Adama, kabiji waikela ke mweo mumi. Bushe mwayuka mba ba pentekosito, nangwa mba Kipwilo kya pentekosito kyakine, kyasemekwa na Muya wa Lesa?

233 Lekai tangepo kintu kimo, pa mineti umo biji papo. Lekai mone, pa mineti umo. Yoano Wazhila, Naketekela, kwepi ko Mbena kuya. Tusakutana kana Kipwilo kya Lesa byo kiji, nangwa ine. Yoano Wazhila, twayai tumone, Naketekela mba akyo kiji pepi nobe 16, 19; 20. Kijitu bulongo. Apano Naketekela mba tusakwikala nakyo, ponka pano. Kijitu bulongo. Lekai ne mutangile, kabiji mumone kana Kipwilo kyasemwa ku Muya wa Lesa, nangwa ine, nobe Adama byo ajinga mu ntendekelo. Monai.

Kabiji jonkaja juba jimo mabanga, byo jajinga juba jitanshi ja mulungu, ne bibelo kasa bashinka mo bapwijile banababwanga mambo a kuchina Bayudeya, Yesu waishile ne kwimana mukachi kabo, ne kwibambila mba, Mutende ekale kwi anweba.

Kabiji byo ebambile byobyoyo, aye wibamwesheshe. . . maboko anji ne lubaji lwanji lumo. Kwepi. . . Ponkapo banababwanga basekelele, byo bamwene Nkambo. Kabiji Yesu. . .

Kabiji ponkapo Yesu wibambile ne jibiji mba, Mutende ekale kwi anweba: byonka byo batuma Bataata kwi amiwa, . . . nanchi ne Amiwa ne mutuma.

234 Monai. Ba Taata bamutumine Aye baile mwi Aye. Kabiji Yesu, Aye umvwe watuma mwanawabwanga, Aye uya mwi aye. Yenka Umo watumanya; Lesa.

Kabiji byo aambile bino, wibapemene, ne kwamba mba . . . Tambulai Mupashi Wazhila:

235 Kipwilo, kyasemwa na Muya wakwa Lesa! Kimino kyanji kyafikile akyo kine byobya, muyewa musango, Muya wakwa Lesa wibapememilwe, “Tambulai Mupashi Wazhila,” ponkapa obewa wi mwaana wakwa Lesa. Obewa wakonsha kwinunga ku kiji kyonse kyo ukeba kuuba, pakuuba obewa wasemwa mu Kipwilo kya Lesa mumi, wasemwa ku Muya wa Lesa. Lesa wapemene pe abo, kabiji waambile mba, “Tambulai anweba,” yii, “Mupashi Wazhila.” Oo, ami! Byobyo kiji.

236 Kechi, “Iyai munungakane, bikai jizhina jenu momwa.” Kabiji na bijilo byenu bya mulajilo ne byonse mo byubilwa, watwela mwakukokolokela. Obewa wafwainwa kunungakana na mwakukokolokela mwaba Methodist, mwakukokolokela mwaba Baptist, mwakukokolokela mwaba Presbyterian, mwakukokolokela mwaba Katolika, nangwa mwakukokolokela mwaba Pentekosito, kintu kyonse kyo ukeba kwinungako, bino obewa ubena kwinunga ku kya kukokolokelamo.

237 Pakuuba umvwe waikala mwaana wakwa Lesa, wasemwa ku Muya wa Lesa. Amena. Kyawama wikilekatu buke bwakyo, ponka pano. Kijitu bulongo.

238 Bumi bwa Lesa ne abo buji mwi anweba, Yesu byo aambile. Pa kaminetitu kamo. Yesu waambile mba, “Amiwa ne Kinchi. Anweba mwi musapi.”

239 Pano talai. Kika kyajinga kisangajimbwe ne Yesu? Kisangajimbwe kyabo ne Yesu, mambo Aye wajinga Muntu ubena kwialula Ayemwine Lesa. Aye wajinga Lesa. Lesa wajinga mwi Kilishitu. Mwamona? Kabiji Aye wibabujile. Aye waambile mba, “Kabiji kechi mutale pe Amiwa ne. Kechi Amiwa ne. Ke Ba Taata, kabiji Abo bekala mwi Amiwa.” Oo! Mwamona?

240 Pano, abo batajilenga pa yewa mubiji mucheche ao wasemekelwe kwi Maliya. Mwamona? Awa kechi wajinga Lesa ne. Awa wajinga Mwaana wakwa Lesa, bino Lesa wajinga mu yewa Mubiji. Wajinga Lesa. Aye waambile mba, “Inge Nabula kuuba mingilo ya Ba Taata, nanchi mwafwainwa kuzhachisha Amiwa. Bino ng’anyi mwi anweba wakonsha kuzhachisha Amiwa na bubu, kubula luketekelo lwa Kyambo? Ng’anyi Kyambo Lesa kyo aambile akyo kyabula kufikizhiwa mwi Amiwa ne?” Bubu ke kubula luketekelo. “Ng’anyi mwi anweba wafwainwa kushiniina Amiwa na bubu?” Bubu ke kubula luketekelo. “Mweshai Amiwa. Inge Nabula kuuba mingilo ya Ba Taata, nanchi kungitabila Amiwa ne. Pakuuba inge Nauba mingilo Yabo. . . Nangwatu anweba kechi mwakonsha

kungitabila Amiwa ne, itabilaikotu mingilo yo Nguba, mambo ayo inshimuna.” Nangwa byonkabyo, “Ba Taata baji mwi Amiwa, nakupana lunshimuna Ayemwine.” Mambo, “Lesu wajinga mwi Kilishitu, saabena kupwanya ba panopantanda ne Ayemwine.” Mwikyumvwa nyi? [Kipwilo kyaamba mba, “Amena.”—Waku.]

²⁴¹ Kyawama, pano, Bumi bumo buji mu Kichi bo buji mu musapi. Musa kutwela byepi Mukyokyo? Kechi kyakonsheka ne.

²⁴² Namwene kichi kechi papita kimye kyabaya ne, mu lubanza wa Mulongo Sharrit ku Arizona, kyajinga na bipangwa naini byapusanapusana byapangako. Kyajinga kika? Kyajinga ke—kyajinga kichi kya jiolingi, kichi kya maolingi. Bino kyajinga na—kyajinga na—na jindema, na tangalini, na tangelo, kabiji ne kipangwa kya magelepu. Kyajinga na byonse. Naimene, natajile pa kyokya kichi. Kabiji Naambile mba, “Mulongo Sharrit, ubena kumbula mba kichi kya jiolingi nyi?”

Aye waambile mba, “Kine.”

²⁴³ Kabiji Naambile mba, “Kiji byepi, pano? Kyaikala byepi?” Naambile mba, “Namona kipangwa kya magelepu *papo*, kabiji ne matangelini *papo*, tangelo *papo*, ne jilemoni *papo*, kabiji ne byonse bye bikwabo bipangwa. Pano kiya byepi?”

Aye waambile mba, “Kyawama, mwamona, bebisokankanyamo.”

²⁴⁴ “Oo!” Naambile mba, “Kyawama, Nasaka kukwimpuzhako kintu kimo. Pano, mwaapako bipangwa bya magelepu ne malemoni. Pano, mwaka wiya, kikooba byepi? Kikasapuka jiolingi.”

“Oo, ine.” Waambile mba, “Kikasapuka na jilemoni. Mwamona?”

“Oo,” Naambile mba, “nemusachila.” Mwamona?

Anweba kuuba mwikyuba ne. Anweba kuuba mwakwatakana nabo ne.

²⁴⁵ “Bino,” aye waambile mba, “kimye kyonse akya kichi po kikekala na mwaka umo kikamena musapi mukwabo wakatataka, kikasapuka na maolingi, umvwe akyo kine kichi kyalupula musapi mukwabo.”

²⁴⁶ Kabiji byo twaeseka kuuba ke kwikala bamembala banungakana ne Nanji, bino twaikala mu jizhina ja Bwinakilishitu. Mambo, atweba tuji, mwailatu kwamba kwaapeela atweba twi bipangwa bya ku kichi, Kipwilo kya Bwinakilishitu.

²⁴⁷ Pakuuba umvwe akyo Kine Kichi kyasapuka musapi, kikekala nobe Kichi kitanshi Kyasapukile. Inge Kichi kitanshi Kyasapuka, banembele Buuku wa Byubilo kunyuma Yakyo; inge

Kyasapuka kikwabo, Kikanemba buuku wa byubilo kunyuma Yakyo. Ibyo.

248 Nanchi, anweba mubena kunungakanatu na mwakukokolokela. Pakuuba umvwe mwasemwa kufuma ku Kichi. . . Obewa uji na kipangwa. Abyo ibyo. Obewa uji na kipangwa, bino obewa uba nakyo ka? “Obewa uji na musango wa bwina lesa, kabiji bakana bulume bwao.” Obewa wakana biyukilo. Obewa wakana byakukumya. Obewa wakana Mupashi Wazhila. Obewa wakana kwamba mu jimi. Obewa wakana bimwesho. Obewa wakana bungauzhi. Obewa wakana lubuko. Kabiji, nangwa byonkabyo, “Witela obewa mwine jizhina.” Kechi kyakukumya ne kyaambijile Mupashi Wazhila mba, “Bulume, bwa jibumba ja bantu, bayulamo mazhina amwenga, kine, kwitela abo bene mba, ‘Benakilishitu.’” “Na misango ya bulesa, bino sababena kukana bulume bwao. Kuba byobyoyo fumaiko, bayuwe musango bo batwala banabakazhi bakosama bayulamo na lwiso lwapusanapusana.”

249 Misango yonse ya kabungwe! Kipwilo kibena kusenda byavula, na *yuwe* musango wa kijiji, kabiji *awa* musango wa kijiji. Pano ibyepi na kijiji kya kwa Yesu Kilishitu? Mwamona? Tuji na bibye bintu bikwabo, kabiji twapana kisendwa kyabaya ku kipwilo. Pano abyoyoyo kiji.

Obewa kechi wakonsha kwinungako ku Kipwilo ne.

250 Obewa unungakana na mwakukokolokela. Obewa wi membala wa mwakukokolokela, mwajibumba ja bantu, kijitu pamo nobe mwakukokolokela. “Twaketekela mu *kikye*. Tuji na mikambizho yetu. Tuji na bya bufyafya byetu, ne bikwabotu.” Mubilatu mu musango umo, anweba munungakanatu na kyatelwa mba-kipwilo.

251 Bino kuuba mwanungakana na Kipwilo ne. Anweba mwanungakana na bamembala bamwakukokolokela, bino kechi Kipwilo ne, mambo anweba mwasemekwa mu kyokya Kipwilo kabiji ne Kichi Akyokine.

252 Pano pembelaiko mineti umo. Talai. Amiwa nsakushika, mu kimye kicheche. Monai. Ndekelaiko mambo. Ami—Amiwa kechi natazha mukwamba kyokyo ne. Talai. Talai.

253 Inge Lesa walengele pamo yuwe musongwa na yewa Mupashi, nishi Kyamulenga awa bunke bwanji kwikala pamo na yewa mupashi, monai, nanchi wasemwa mu bobwa Bufumu. Kabiji abwa Bumi bwajinga mu *kikye* Kipwilo, buji mu *kyokya* Kipwilo, ne *Kyokya, Kyokya, Kyokya, Kyokya*. Kabiji abwa bonka Bumi bwajinga mukachi, ka Kichi, Yesu, buji mwi membala ao Ye abikako. Lukumo! “Na bintu bimo byo Nguba, mingilo yo Nguba, ne anweba mukeyuba.” Kuji membala wa kine wa Mubiji wa Kilishitu, kechi pajipo jizhina Jabikwapo ne. Mingilo yonka ya yewa umo imushinikisha kwepi ko afumina. Bwanji bumi bupana lushimuno lwa byo aaji.

254 “Obewa yobe ng’anyi membala? Ng’anyi mubiji ye ujimo?” Aye Mubiji wa Kilishitu. “Kyawama, kwepi ko Watwelejilemo?” Amiwa ne. Amiwa nasemekelwe Monka. Mwamona? Amiwa nasemekelwe Monka.

255 Obeaa kechi wafwainwa kwibabula ne. Abo bayuka kika kyamweka. “Obewa, wafwainwa kwambula byepi kandulu ne kwikabika mushi ya musansa?” Aye byo aambile. Mwamona? Ine, ine.

256 Inge wasemwa mu bobwa Bufumu bwa Lesa, nanchi Bumi, abwa bonka Bumi bwajinga mwi Yesu. Nanchi obewa wikala na kijikila na myeo. Apo kechi wafwainwa kusashijila bantu, kwiya ku kitapisho ne. Obewa kechi wafwainwa kusashijila muntu umo ne, iyai na kukebela pamo nabooba baji pa kitapisho. Ee. Abya—abya—abya bintu bitatulatu kubiwa abyo bine, mambo akuuba mba bya Bikwa bukatetesho mwi obewa. Obewa wi kintu kimo kya Lesa. Obewa wabikwa katetesho na Mupashi Wazhila.

Pano mwayuka kine kintu “aye Mupashi Wazhila” kyo alumbulula nyi?

257 Kechi kyalumbulula mba, “Natolokele ne kubijika. Amiwa najinga nang’umvwino ingi.” Abyo byonse bijitu bulongo. Amiwa natolokele ne kubijika, kabiji najinga nang’umvwino ingi. “Naambile mujimi.” Naketekela mba Mupashi Wazhila waamba mujimi. Kine. “Amiwa ne kilondolola.” Ee, mwane. Naketekela kyokyo, ne akyo. Bino akyo kechi Ikyo ne. Akyo kechi kyo Mbena kwambapo ne. Apa pafwainwa kwikala panungakana pantu pamo. Apa pafwainwa kwikala panungakana *papo*, mu butekanye bobe.

258 Lekai muntu akwimbe lupi lubiji lumo, lwa kilungi, wafwainwa kwalukila kukwabo nyi? Bino anweba mwamba mba, “Awa kafutufutu wabiko!” Nachi apa paji kunungakana, pantu pamo, pamweka. Kyawama twasha kyokyo bunke bwakyo. Kijitu bulongo. Bino mwayuka mo Nekitazha.

259 Pakuuba umvwe wabikwa katetesho mu Mubiji wa Kilishitu, nanchi obewa wi wayulwamo-Mupashi, kabiji wi mwaana wakwa Lesa.

260 Oo, Nalanguluka mba inge Najingatu pepi nobe mamineti teeni, a kutangapo kintu kimo papo. [Kipwilo kyaamba mba, “Yangatu kulutwe. Kitange, mulongo.”—Waku.] Bino mwafwainwa kundekelako mambo pa mamineti akwabo teeni? [“Ee.”] Nakeba kutangapo kintu kimo, pachechetu. Pano, kwamba bukishika, kunde kechi yafwainwa kupya ne. Amiwa nsakwimupa luketeketlotu, monai, inge tusakutanga kikye pa mamineti acheche. Ke kintu kyawama bingi kulupuka. Amiwa njina bintu bimo papo, byaiyatu mu milanguluko yami, byo Nafwainwa kutemwa kwamba.

261 Twayai tuzhikule mu Yoano Wazhila, kyapitala kyabu 3, kwamba pa Bumi bwa Peenape. Twayai tumone byo Kyaamba papo pa lulwe lukatazho lwa Bumi bwa Peenape, Bumi bwa Lesa. Pano, monai papo.

Kwajinga muntu wa mu Bafaliseo, watelwa mba Nikondema, tangi wa ba Yudeya:

Aye wayishile bonkabwa bufuku kwi Yesu, ne kumwambila mba, Labi, twayuka mba anweba mwi mufunjishi wafuma kwi Lesa: . . . kafwako muntu wakonsha kuuba bibye byakukumya ne . . . kanatu Lesa uji nanji.

262 Pano, abo, ba mukije kya ba Sanihedilini, bayukile mba Aye wajinga Mwaana wakwa Lesa. Abo bekiyukile. Awe ye tangi wabo ponkapa, kasa abena Kumubula mba, “Twayuka mba Anweba mwi Mufunjishi wafuma kwi Lesa, mambo Bumi bonka bwa kwa Lesa bubena kupita mwi Anweba.” Mwamona? “Twayuka mba kufunjisha kwenu kechi Kwenu Anweba bene ne. Ke kwa Lesa, mambo Lesa ubena Kwikushinikisha.” Mwamona? “Abo Bumi bwa Lesa bubena kupita mwi Anweba.” Pano monai.

Yesu wakumbwile ne kwamba mba, Kine, . . . Nemwambila namba, Kanatu muntu wasemwa jibiji, aye kechi wakonsha kumona bufumu bwa Lesa ne.

263 Oo, ami! “Kanatu wakwatakana na kipwilo kyami”? Oo! Mwamona byo Baya mungu nyi? Mwamona? Mwamona?

Yesu, nanchi Yesu wakumbwile mba, Kine, kine, Nemwambila namba, Kanatu muntu wasemwa ku meema ne . . . Mupashi, kechi wakonsha kutwela mu bufumu bwa Lesa ne.

Akya kyasemwa ku . . . buntushi bo buntushi; kabiji akyo kyasemwa ku . . . Mupashi ye mupashi.

Kechi mukumye Amiwa byo nemwambala mba, Mwafwainwa kusemwa jibiji.

Mwela upupila konka ko asaka, . . . Monai, kubwela kunyuma ne jiwabo, monai, kubwela lunyuma, monai.

Mwela upupila konka ko asaka, . . . obewa kechi wakonsha kumvwa jiji janji ne . . . bino wakonsha kumvwa kilulumo, bino kechi wayuka ko lufumina ne, nangwa ko luya ne: byo biji ne bonse . . . basemwa ku Mupashi.

Nikodema wamwambile mba, Lelo abye bintu bikonsheke byepi?

Yesu wakumbwile ne kumwambila mba, Anweba mwi mufunjishi wa bena Isalela, kabiji kechi mwayuka bino bintu nenyi?

264 Talai pakyokyo, mulongo, ke—ye D.D., Lh.D., babiji ba-L.D., monai, “Kabiji kechi mwayuka bino bintu nenyi?”

Kine, . . . Nemwambila namba, Atweba twamba byo twayuka, kabiji tushimuna byonka byo twamona; nangwa byonkabyo anweba kechi mwatambula bukamonyi bwetu ne.

265 “Twayuka bibye bintu. Atweba twibimona. Atweba Twikiyuka, kabiji anweba kechi mwatambula bukamonyi bwetu ne.” Wanungakana-na kipwilo! Mwamona?

Umwwe Amiwa ne mubuula bya panopanshi, anweba bonse ne kwitabila ne, pano muketabila byepi, inge Nemubuula. . . bya mwiulu?

266 Pano telekai ku kikye. Talai.

Kabiji kapaji muntu wakanjijilemo mwiulu ne, poso yenka wafumine mwiulu, ye Mwaana muntu yenka aye uji mwiulu.

267 Langulukai pa kyokyo.

268 Mwayuka, kimye kimo, Aye waambile mba, “Mwalanguluka byepi pe Kilishitu? Aye ye Mwaana Ng’anyi?”

Baambile mba, “Aye Mwaana wakwa Davida.”

269 Aye waambile mba, “Pano kika Davida, mu Mupashi, kyo aambijile kwi Aye mba, ‘Aye Nkambo wamwambijile Nkambo yami mba, “Ikala Obewa ku kuboko Kwami kwa kilujo?” Wakonsha kwikala byepi Nkambo Yanji ne Mwaana Wanji?” Kafwako muntu nangwa umo Wamukumbwile kintu kikwabo ne.

270 Mu Lumwekesho, Aye waambile mba, “Amiwa ne Muzhazhi ne Kisaka kya Davida.” Mwamona? “Amiwa ne Kichi kabiji ne Musapi. Amiwa yami ntendekelo. Najinga koka ntendekelo. Najinga ntendekelo, kabiji—kabiji Najinga Kisaka Kyanji, ne aye.”

271 Pano, papo Aye waambile mba, “Kafwako muntu nangwa umo wafuma Mwiulu ne, kana Mwaana muntu yenka uji Mwiulu.”

272 Inetu wangipwizhe, kimye kimo, jipuzho. Naambile mba, “Nkumbwilai kikye.”

Waambile mba, “Ing’anyi Yesu ye alombeleko, mu bujimi bwa Gesemani?”

273 Naambile mba, “Ing’anyi Ye aambilengapo byo Aambile mba, ‘Kafwako muntu wailepo Mwiulu ne, pakuuba kana Yenka wafumine Mwiulu, kana yenka Mwaana muntu uji. . . ao pano uji Mwiulu? Ng’anyi?”

274 Pano Aye uji pano, kasa aimana papo peulu ya nzubo, ne kwamba kwi Nikodema, amba, “Amiwa nji Mwiulu.” Abye ibyo? Twayai tushe kyokyo poso bufuku buno. Mwaamba

mbaka? [Kipwilo kyaamba mba, “Amena.”—Waku.] Kimye kibena kupwa. Oo, ami! Lekai mulangulukepo pa kyokyo pa kakimye kacheche, mute uno.

²⁷⁵ Mwakonsha kutwelamo byepi mu Kipwilo? [Kipwilo kyaamba mba, “Kusemwa.”—Waku.] Kusemwa. Kuka? Na Muya wa Lesa.

Mpemenai, mpemenai;
Mupashi wakwa Lesa mumi, mpemenai.

²⁷⁶ Ayo yo milombelo yami: lekaitu Mupashi Wazhila apeme. Oo, ami! Mambo, Muya wa Lesa, Ye ng’anyi? Wabikwa katetesho ka mu Bufumu bwa Lesa, byo nayuka kyokyo, kimye kitanshi kyo Nashimwine, Naketekela Yesu Kilishitu. Ee.

Nanchi, ku Lwitabilo lwami, Nabikapo bulume, bulume bwa bulesa.

Nanchi ku bulume bwami, Nabikapo maana a Kyambo.

²⁷⁷ Ku maana ami, Nabikapo kwikanya, kwikanya-obewa mwine. Natemwa kyokyo. “Kyaalo kyami kyo kyenu, mwwikai mweo wami na kwikanya, kufuma ku kalunga kufika ku kalunga kabembela.” Mwamona?

²⁷⁸ Butekanye. Oo, ami! Kyaesekwa. Kechi musakamane ne; Satana ukemubelangala byo. Mbena kukajila ndandalashi ponkapano. Mwamona? Amiwa nanungako bulume, maana, kwikanya, pano Nafwainwa kubikapo butekanye. Amiwa kechi nji na Mupashi Wazhila ne.

²⁷⁹ Pano panyuma ya kubikapo butekanye, Nabikapo bulesa. Mwayuka akyo byokiji nyi? Pamo nobe Lesa. Nabikapo kyokyo. Kechi kuuba byubilo byatama amiwa mwine ne. Yanga nobe mwanamulume Mwinakilishitu byo afwainwa kuuba. Lekai kyokyo kechi kikale nobe kya-kumvwala ne. Kintu kiji mwi amiwa, butemwe bwa Lesa, bubena kuselauka. Mwamona? Mwamona? Kechi kwaamba mba, “Uu-uu-uu-uu, nsongwalume, Nakonsha kwikyuba, bino kapepo Kyawama Nabula Kwikyuba ne.” Mwamona? Uu-uu. Uu-uu. Kiji konka, nangwa byonkabyo.

²⁸⁰ Ke Kusemwa. Amiwa nasemwa mu *kikye*, mu *kikye*, mu *kikye*, mu *kikye*, mu *kikye*, mu *kikye*, mu *kikye*. Kabiji ne butemwe bwa Lesa, Kilishitu, bwiya panshi na kubika tutetesho pa byonse biji mwi amiwa, na mambo a kwingila mwingilo. Mwamona?

²⁸¹ Pano Aye uba byepi umvwe Wampa Mupashi Wazhila? Aye ukubika pa kifulo kyapusanako ne obewa mwine, ukubika kayukilo. Mwamona? Obewa pano ke muntu wapusanako. Obewa kechi wi wa mu inontanda ne, kafwako kutwajijila ne. Mwamona? Wamvwikwa vwajilo yapusanako. Obewa wamvwala byapusanako. Kechi muyuwe ndeleshi ne. Ine, ine. Obewa kechi wafwainwa kwikala wapusanako nangwa wiyikelatu pa bunke boobe, kabiji ne teneshi yafutuka, ne kijilo kyalepa, nobe. Ine,

ine. Obewa kechi wakonsha kuuba byobyoye ne. Obewa wamvwala, mwaila ku mubiji, nobe bibye. Kimvwalo kya bu mupashi kyo kibalwa. Kya kuvwala kya masongola kyabikwa pe obewa. Yobe ng'anyi?

²⁸² Nobe Yesu, monai, Aye wanyeng'amijilwe, kabiji Aye waalwilwe konka ku meso abo, kabiji ne kya kumvwala Kyanji kyasamine nobe juba. Aye wajinga, Yesu, Lesa ubena kwikajika Mwaana Wanji Mwine. Mwamona? Kabiji kwaishile Mosesa. Ponkapo kwaishile Elaija. Kabiji Petelo waambile mba, "Mwayuka, ke—ke kintu kyawama kwikala kuno." Mwamona muntu byo ekala nyi? Ee. Oo, ng'ingijilo ya bulesa yaubona! Waambile mba, "Twayai tushimike matabbanako asatu. Twayai tushimike umo kwi Mosesa, kabiji ne mukwabo wa kwa Elaija, kabiji ne mukwabo Wenu."

²⁸³ Kabiji kasa akyangye kupwisha kwamba ne, Lesa wamvweteletu kyonse, waambile mba, "Awe ye Mwaana Wami ye natemwa. Mu byonse bye bintu byo Nakebelenga kwi Mosesa, ne kubikapo mizhilo mwi Mosesa; abo buchibishi bwamambo bwaoloka na bangauzhi; Aye wafikizha byonse. Mumvwai Aye. Amiwa nsakufumamo mu kipikichala pano. Mumvwaitu Aye. Mumvwaitu Aye." Oo, ami! Ke kintu kyawama bingi!

²⁸⁴ Nanchi, umvwe twafikilamo mu bibye bintu, kabiji twaikala bayulamo bulume bwa Lesa ne bintu byakwa Lesa, nanchi Mupashi Wazhila wiya ne kwitubika tutetesho twa mu Bufumu. Kechi musakamane ne. Muntu yense ukayuka mba muji Nanji. Anweba kechi mukasaka kwamba mba, "Kyawama, lukumo lwikale kwi Lesa, Nayuka mba Njina Nanji. Naambile na njimi. Lukumo lwikale kwi Lesa, Nayuka mba Njina Nanji. Nazhiile mu Mupashi kimye kimo." Anweba kechi mukasaka kwambapo kyambo kimo pa kikye ne. Muntu yense ukayuka mba uji Nanji. Obewa kechi usakamane ne. Ee. Aye mwine ukapana lushimumo lwanji Mwine. Aye ukaleka kyayukanyikwa mu bantu.

²⁸⁵ Lesa emupeshe. Njibingi na lusekelo pa kutanwa kuno ne anweba lukeelo luno, ne kwikala na kino kimye kya lumvwang'ano lwa bupopweshi. Telekai, kipwilo kyetu kicheche kya kyakepa, kabiji nangwa byonkabyo kechi tuji na mpuzha yabaya ya bantu beya kuno ne. Atweba kechi twi kabungwe ne. Twaketekela kabiji kwikala na lumvwang'ano lwa bupopweshi na kabungwe konse. Anweba mwayatu kuno mambo mubena kukeba kwiya. Kabiji anweba, twimutemwa. Kabiji tubena kukeba kabungwe konse, muntu yense . . .

²⁸⁶ Naketekela mba muji bantu mu tonse tubungwe twa Benakilishitu. Abo ke balongo ne banyenga mwi Kilishitu.

²⁸⁷ Nanchi, onkao mambo, kechi tujipo na mizhinge ne, kafwako nangwa kimo kya kutwelamo ne, kafwako kyakuuba ne kana kwikalatu Mwinakilishitu. Nobe byaambanga E. Howard Cadle

mba, “Atweba kechi tujipo na mizhilo ne kanatu butemwe, kafwako buuku ne kanatu Baibolo, kafwako mafunjisho abantu ne kanatu Kilishitu.” Abyo ibyo. Iyai na kwitupepula. Tuji bingi na lusekelo pakuuba kyokyo. Twaketekela Mamboawama Onse, kyonse Kyambo. Twaketekelatu byonka byo kiji. Atweba kechi tunungapo kimo pe Akyo ne, kufumyapo kintu kwi Akyo ne, kubikapo kabungwe kaji konse ne bintu bikwabo kwi Akyo ne. Atweba Twikilekatu byonka byo Kiji. Abyo byokiji. Kabiji atweba tuji bingi na lusekelo lwakwimutambulwila kimye kyonse. Anweba mwaiya na kwikala nentu inge mwakonsha. Tulombelela bakolwa. Twaketekela bintu byonse byaamba Baibolo. Atweba “tubena kulubako kunekena kwetu, kunyuma, kabiji tubena kukanamina kikokwanyi kya Lwito lwetu.”

²⁸⁸ Pano, kintu kimo kikwabo. Mwakonsha kwikiswisha kwikyamba nyi? Juba ja kunyuma keesha lukeelo . . . Mwakonsha kumona pa—pa bbondi papo, kimwesho. Najinga na kimwesho. Kyajinga pepi nobe faivi koloko, nobe bakazhi bami kunyuma kokwa bayuka, nangwa sikisi. Nabukile. Twabukile na kunengezha baana kuya ku sukuulu.

²⁸⁹ Amiwa njitu na bibye, kimye kyonse. Kabiji anweba bonse mwayuka, anweba bonse muno, amba kechi bikakalwa ne. Abyo, kine byalumbuluka bingi. Mwamona? Abyo kechi bikakalwa ne.

²⁹⁰ Kabiji Nalangulukile mba Najinga muntu wa lusekelo ye Nakimonapo kala. Amiwa na imene mu juba, j-u-b-a, kabiji wa—kabiji wasapwijilenga Mamboawama ku kyabaya, kipwilo kyabaya bingi.

²⁹¹ [Mulongo Branham waimanako—Waku.] Nakebelenga kumona kana abya be bikopelenga pa tepu.

²⁹² Kya—kyabaya, kipwilo kikatampe, kabiji baikele mu jisaka. Kabiji mitetenga ya juba ibasaminenga pobaikala, kijitu *papo* ne *popa*, na Kwikitambula, na kutambulwila Kyambo.

²⁹³ Kabiji Amiwa, byonka byo kikala, Kimye kyonse kubajisha, kupwisha mu kimye kyapwa, kusapwila kimye kyabaya. Kabiji Nasapwijile pa kimye kyabaya, poso kipwilo kyaikala na zala ya kajo ka ku mubiji. Kabiji abo, bamo mwiabo, baikele ba kooka. Nanchi baimenetu, balupuka na kwibakela kajo, batatwile kulupuka pangye.

Naambile mba, “Kuuba kyokyo ne. Kuuba kyokyo ne.”

²⁹⁴ Najinga na bipimo bibiji byo Nakebelenga kukumanya, Nakebelenga kukumanya, mu busapwishi bwami. Kabiji aye Nkambo wikipaine kwi amiwa. Kabiji musapwishi yense wayuka, inge kine wayuka mba Lesa wikipana kwi obewa, ubena kupya na kukeba kubulang’ana ku bantu.

²⁹⁵ Kabiji Nasapwijilengatu, Charlie, nangovu yonse mo Nakonshesha kusapwila, na kwikiletatu, mwayukatu, ne kwamba mba, “Byonse bye bintu bikatampe, *abye* byo

abena kuuba Lesa. Talai pa *kikye*. Aye upima milanguluko ya muchima. Akyo Kyokika? Kyo Kyambo.” Kabiji yaingatu muyekao musango. Kabiji, oo, Nalanguluka namba inge nakonsha Nkuvuluka byo Naambilenga kabiji ne kibaaba kyami byo kyajinga. Amiwa kechi nakonsha kwikilanguluka ne. Mwamona? Bino Amiwa nasapwijilengatu.

²⁹⁶ Kabiji Nemwenenga amiwa mwine amba ne kyube. Kabiji pano byo Naimene popa, na kutajisha, ne kwikeketa amiwa mwine na Kwikisapwila.

²⁹⁷ Kabiji Amiwa nasapwijilengatu, ku-booba-babula-kwikala-nakyo. Kabiji pakupita kimye kicheche, Naimeneko, mwayukatu, kabiji Nalangulukile mba, “Lukumo lwikale kwi Lesa!” Naambile mba, “Talai pa bibye bintu byawama, ne *bibye, byobya!*”

²⁹⁸ Ponkapotu, Namwene bantu batatula kwikala nobe bafwa nzala ya ku mubiji. Kabiji nanchi bajinga na bumupashi bwabaya bingi, nanchi batatwile kufumako. Kabiji bamo ba mwiabo [Mulongo Branham waaula mwau—Waku.] batatwile ne kufumako.

Nalangulukile mba, “Lukatazho ka luji na muntu yense?”

²⁹⁹ Kabiji—kabiji Namwene, kabiji kuno namwene banyike baji mumansongola kasa babena kuya kulutwe, ku lubaji lwami. Nalangulukile mba. . . Naambile mba, “Pamineti umotu, mulunda! Pa mineti umotu! Obewa ukabwela jibiji kimye bivule bya mabaanga abufuku byapona.” Mwamona? Naambile mba, “Obewa ukabwela jibiji. Bino lekai ne mubuule kiky kimpimo kitanshi. Abye bintu byonse bifumapi, byo Ne mumwesa anweba? Kwepi kobaji?” Naambile mba, “Baji pano. Baji mu Kyambo kya Lesa. Abo baji mu ABYO BYOBYAAMBA AYE NKAMBO, mulaye Wanji. Mambo,” Naambile mba, “anweba bonse mupana lushimuno kwi amiwa, ikalai bukamonyi na kiky, amba mwingilo wami ke, ‘Kwikala na Kyambo.’” Naambile mba, “Lukatazho luji kwepi ne anweba bonse? Kechi mwakonsha kukwatakanya Kyambo ne? Mwafwainwa kwi Kyumvwa.”

³⁰⁰ Kabiji bamo ba mwiabo baambile mba, “Mwanamulume, Nafwainwa kutemwa kwikala na mabisiketi,” kabiji ne bikwabotu.

³⁰¹ Kyawama, Nalangulukile mba, “Kyawama, lukumo lwikale kwi Lesa! Inge bakeba mabbisiketi, balekai baye nakuleta.”

³⁰² Nanchi Na—Nazhokolokele. Nalangulukile mba, “Oo, bino, mwayuka kine kintu nyi? Bivule bisakupona, pa kupitapo kimye, ponkapotu.” Naambile mba, “Nanchi, bufuku buno, inge akya kipwilo kyabungakana jibiji, Nkabika kipimo kimo kwi abo, kabiji ne kwibabula mba bintu byo bamona kasa mbena kwi byuuba byatanwa mu Kyambo kya Lesa, kechi mu buuku wa bufyafya nangwa kabungwe kamo ne. Kitanwa mu Kyambo.

Mwamona? Kyonsetu kye, kiji mu Kyambo, mambo Amiwa napewa mwingilo wa Kyokyo.”

³⁰³ Nalangulukile mba, “Mwayukatu, bakekala, bonsetu, basa kubwela bufuku buno, nanchi abye byo Nsakuuba. Amiwa nsakubwela lunyuma, pamo nobe kubwelulukamo.” Anweba mwayuka byo Nguba pa mankulo ne bintu bikwabo, kwamba byo Naambile kunyuma. “Amiwa nsakubwelulukamo, mu Kyambo, kabiji pano akye kikatampe, kipimo kyakukumya.” Naambile mba, “Kikekala kimye ka! Lutakaiko lwikale kwi Lesa!” Kabiji Nemwene amiwa mwine kuya na kuchešana, ne kumvwa kyokyo, “Jitotwe ja Lesa.” Nemwene amiwa mwine kasa mbena kuya na kuzhimang’ana *byobya*. Kabiji papo po Najinga, kasa naimana popa.

³⁰⁴ Pano, akino kyo kilumbululo. Mwamona? Kintu kitanshi kyo Nauba, bintu byaubiwa, byajinga bya bufyafya ku bantu, pepi nobe byonsetu. Amiwa kechi natazha mu kuuba mba Mamboawama Onse ne bazhijikwa ba kwa Lesa ne, bino, Natazha mukuuba mba, mu bantu bavula. Kabiji kechi mukeba kutala pa ntanda ne, kosmos, nobe Mbila yakwa Lesa. Inge waya ne kwamba mba . . .

³⁰⁵ Nobe byonka byaambile Boze, “Amiwa kimye kyonse . . .” Waambile mba, “Amiwa najinga na kiloto, myaka yapita kunyuma, amba aye—aye Lesa ukatuma ku Chicago ne kusukanya Chicago ku lukumo lwa Lesa.”

Naambile mba, “Yosefwa, Aye wikyuba kala.”

“Kika,” waambile mba, “kechi bakisukenapo kufuma ku kimye kya kwa Moody ne.”

³⁰⁶ Naambile mba, “Akyo? Mbena kwamba pa Kipwilo. Akyo ke nsono ya kuja banyama. Alo ke lukungutu lwa pantanda, aja jibumba jibena kuyula mu mikwakwa, ba Yezebeli bepeta ne bintutu bikwabo.” Naambile mba, “Abyo biji momwa. Abya bikatampe mwakukokolokela kabiji ne bintu bikwabo bikonaika ne kuponena mu mikwakwa momwa.” Naambile mba, “Aye ubena kwamba pa Kipwilo. Akyo Kipwilo kyamwene lumwekesho lwa Yesu Kilishitu lwasololwa, kabiji be Luyuka. Abo kechi bakonsha kwikala fiftiini kufuma mu Chicago ne. Kechi mwafwainwa kwikala teeni mu kino kisemi ne, kufuma mu muzhi wa Chicago, bakalupukamo.”

³⁰⁷ Bushe mwakilangulukapo pa kyokyo nyi? “Byonka byo kyajinga mu moba akwa Nowa, nanchi byobyo kikekala ne pakwiya kwa Mwaana muntu, amo mwapulukiletu myeo eiti.” Uu-uu. Baanga balupukile kufuma mu Sodoma? Mwamona mo Nekitazha nyi? Nazhinauka kana jikekala jibumba. Mwamona?

³⁰⁸ Pakuuba Kipwilo Akyo kine kyatambula kusukana. Abo bekiyuka. Abo bayuka Kyambo. Abo bamwene Kyambo byo kyafikizhiwenga, kabiji be Kimwene. Pano talai pakyokyo pa mineti umotu, ponkapano.

309 Kabiji aye Mbila itanshi, byo Beimwene, muntu yense Wiyitambwile, ne kwamba mba, “Oo, lukumo lwikale kwi Lesa! Oo, inge Nakonsha kumona *kikye, kyokya*, kabiji ne *kikwabo*.” Kabiji ponkapotu baya, mu musangotu umo mo baishijile. Mwamona?

310 Kabiji pano balanguluka mba, “Kyawama, Amiwa kechi nayuka ne. Kwepi ko mwakonsha kukwatakana? Inge Nabula kwiya ku *kikye*, kikekala *myuwe* musango. Kabiji Amiwa kapangwamo, muno, kabiji Amiwa kechi kekala na kyakuuba *kuno ne*.” Balongo baikala panshi ne kwamba mba, “Kyawama, kika kyo Nakonsha kuuba inge Na. . .?” Mwamona popo? Abo kechi bakemana kimye kyabaya pakuuba mba bayuke mba Ke Kyambo akyo Lesa kyo alaile ne, byo kyasololwa ne. Mwamona? Kabiji abo bafumineko.

311 Bino, kechi musakamane ne, bivule biji pepi, monai, inge Nabwela ku mwingilo.

312 Anweba vulukai, bufuku bukwabo, aya Mbila yo Ampele kunyuma kokwa kimye kyo nabikilenga jibwe ja jikoka? Byonka byo kyajingatu. Waambile mba, “Ingila mwingilo. . .” Waambile mba, “Inge wafuma mu kikye kimwesho, tangai Timoti Wabubiji 4.” Mwayuka, kyaikala ponka pa jibwe ja jikoka, myaka saate-fiili yapitapo.

313 Waambile mba, “Ingila mwingilo wabusapwishi, shininkisha mwingilo obe. Mambo kimye kikeya kyo bakabula kuswa Mafunjisho alumbuluka; bino monka mwaya lwiso lwabo bakevuzhizha bafunjishi baabo, byo baji na matwi ababana; ne kwalukila. . .kufuma ku Bukine ne kuya ku bishimitu.” Inge akyo kechi byo kyaikala ne, ponka pa kyambo pa kyambo! [Kafwapo bijipo pa tepu ne—Waku.]

314 Bino, vulukai, nanchi, bufuku bukwabo, byo Nabujile kutanga byashalapo. Aya myaka sate-ne bikwabopo yo Nasapwila mu ino tabbanako, kechi Nakipitailapo nangwa kimye kimo kupitaila popo ne, kabiji kechi Nayuka ene mambo ne.

315 Amiwa bimye byavula nkumya, poso, juba jimo, Namwene Yesu byo atolele Muvungilo wa buuku ne kutatula kutanga, kabiji watanga afu wa bungauzhi, kabiji waimene, ne kwamba mba, akwa ku Kapenama, Aye waambile mba, “Kabiji jino juba, abwe bungauzhi bwafikizhiwa.” Kika Aye kyo abujiile kutanga byonse byashala? Kyatala pa Kwiya Kwanji kwabubiji. Mwamona?

316 Kabiji popa Natangile kyokyo, kwakubula kuyuka ne. Natolele kyokyo, kabiji byo kyajinga, kumeso ami, ku Southern Pines, South Carolina. Alwa lukeelo, byo naimene popa, na kwisamba ne Joseph Boze, nashakamijile ku lubaji lwa motoka, Nkyambile. [Mulongo Branham watobanya ku munwe wanji—Waku.] Paulo waambile mba, “Amiwa. . .Bonse bantu

bangalukilamo amiwa. Kechi kujipo muntu nangwa umo uji kulubaji lwami ne. Demasa wankaana; byo atenwa ino ntanda. Kabiji Nayuka. . .” Talai. “Kabiji sendwe wa byela wanguba kintu k yatama bingi.”

³¹⁷ Monai Demasa byo afwaijilwe kulanguluka: “Kika, Namona Paulo kasa abena kusapwila Mamboawama ne kubuka bakolwa. Kabiji pano aye waikala, na kumanama, aye mwine, ne kusenda dokotala mulwendo, Luka. Kimye kyonse kyo ailenga, wasendelenga dokotala, muntu ubena kusapwila lubuko lwa Bulesa. Kika, Namumwene wampofula muntu meso. Waambile mba, ‘Aye Nkambo akulengulule, kabiji obewa ukekala mpofu mukimye kimo.’ Kabiji waleka sendwe wa byela wamupanga mu mbung’eno. Naketekela wataile bulume bwanji bwa kupofula bantu meso. Amwai, wataile bulume bwanji bwa lubuko lwa Bulesa. Lesa wamwalukila.”

³¹⁸ Amiwa kechi nalanguluka mba Demasa watwajijile kwikala pantanda, mambo Demasa wajinga wa. . . Mwayuka jishimikila janji. Aye wajinga wa mu kisemi kikatampe, kisemi kya bunoshi. Kabiji wakebelenga kuya na jibumba jonse jashala.

³¹⁹ Pakuuba, Paulo, kamulanda Paulo muचेचे. Kyajinga kika? Lesa kimye kyonse uleka mwingilo umo wafika pa musango yewa, bino apa wabwela wamutumbijika.

³²⁰ Aye wamulekele Yesu wafika pa kifulo kimo. Talai pakyokyo. Bino Aye wakonsheshe kusangula bafu, Aye wafwaijilwe kuuba kintu kiji kyonse kyo Akebele kuuba; kabiji waleka mushilikale mwina Loma wamundosa myevu kufuma mu kilungi Kyanji, kabiji ne kushipila mu kilungi Kyanji. [Mulongo Branham wauba mvumino ya kushipa mate—Waku.] Bamupumine Aye pa. . . Babika jiponda mu kilungi Kyanji, ne kwamba mba, “Pano, Obewa wayukatu, bambula mba Obewa wi Ngauzhi.” Bonse baimenetu na matete, ne kumupuma Aye mu mutwe. [Mulongo Branham wapuma kintu kimo.] Waaambile mba, “Pano tubuule ng’anyi wakupuma Obewa.” Aye wayukile ng’anyi Wamupuma. Uu-uu. Kine. Aye waubile. Mwamona? Bino mwingilo Wanji wajinga ubena kunengezhiwa kumvwikwa muchinya.

³²¹ Kimye kyonse kifika patu pamo pokimweka nobe kine, kine kyakooka, pepitu kupwa, apa Lesa po amumvwika muchinya.

Anweba Nkambo, lekai kimweke. Lekai kimweke, Nkambo.

Twayai tukunyike mitwe yetu.

Namutemwa Aye, Namutemwa Aye

Mambo Ye mutanshi. . .

Pano mumpopwelai Aye. Twajinga na lufunjisho lwakosa bingi.

Kabiji wapotele lupulukilo lwami

Pakichi kya ku Kalvali.

³²² Twayai tusutule maboko etu pano kwi Aye.

Ami . . .

Pano ikalai mu Mupashi, monai, “Namutemwa Aye.”

. . . Namutemwa Aye
Mambo Ye mutanshi kutemwa.
Kabiji wapotele lupulukilo lwami
Pakichi kya ku Kalvali.

³²³ Pano, twayai twimane, twimane.

Mu lwimbo wetu mucheche wa kupalang’anya bantu, tubena kwimba veeleshi mutanshi, tusakwiyimuna mu maboko umo ne mukwabo; mu veeleshi wa bubiji, tusakwimbila Lesa. Kijitu bulongo. Kabiji popo tusakupalang’ana.

Pano, twayai twimbe:

Yanga Najo ja kwa Yesu,
Mwaana wabulanda ne wamalwa;
Jikakupa lusekelo ne lutekenesho,
Yanga Najo konse konse.

Jizhina Jawama, Oo jawamisha!
Luketekelo lwa ntanda ne lusekelo lwa
Mwiulu;

Jizhina Jawama, Oo jawamisha!
Luketekelo lwa ntanda . . . Mwiulu.

³²⁴ Pano, vulukai kikyeye, pano. Nsakwipuzha mulongo mucheche, papo, ye Najinga nanji mu kibamba mamineti acheche apitapo; wa—wawama mulongo mucheche, mishonale ku ba Assemblies mungye kokwa; Nalubamo jizhina janji, Amiwa nsakumwipuzha, kwitulupula mu milombelo inge twapwishatu kwimba veeleshi walondelapo:

Yanga Najo ja kwa Yesu,
Jojikebo jobe;
Meseko umvwe akuzhokoloka,
Kejiteletu Jizhina Jazhila mu milombelo.

³²⁵ Monai badiabola batatula kufuma pano. Mwamona? Pano, vulukai:

Yanga Najo ja kwa Yesu,
Jojikebo jobe;
Meseko umvwe akuzhokoloka,
Imanaitu, ne kwijitela aja Jizhina Jazhila mu
milombelo.

³²⁶ Monai kyakonsha kumweka. Kijitu bulongo. Bosetu pamo.


Yanga Najo ja kwa Yesu,
Jojikebo jobe;
Umvwe meseko akuzhokoloka, (Wakonsha
kuuba byepi, pano?)
Kejiteletu Jizhina Jazhila mu milombelo.

Jizhina Jawama, (Jizhina Jawama!) Byo
 jawamisha! (Byo jawamisha!)
 Luketekelo lwa ntanda ne lusekelo lwa
 Mwiulu;
 Wawama . . . , (. . . ? . . . monai yewa
 nsongwakazhi mucheche . . . ? . . .) Oo
 jawamisha! (Iya kuno, mutemwe wawama.)
 Luketekelo lwa . . .

³²⁷ Mu kimye kyo mwaimana popo: Kimye kyapeleleko kyo Najinga pa tabbanako, pano (Awe maama watwajijilatu na kuseka ne kutongola munwe ku mwaana.), awe mwaana wajinga mu byeela. Awe papo, kunyema na kuzhokoloka monse muno, na kukaya bulongo jaleelo. Bushe kikye kechi kyawama nenyi? Totai Nkambo. Pano, monai papo: Mutemwe, obewa tolokela panshi ne kwibamweshwa, kokwa, byo wakonsha kunyema konse konse. Mwamona?

Oo, Jizhina jawama, (Vulukai, Kijilo bufuku buno, pano.) . . . byo jawamisha!
 Luketekelo lwa ntanda ne lusekelo lwa
 Mwiulu;
 Jizhina Jawama, Byo jawamisha!
 Luketekelo lwa ntanda ne lusekelo lwa . . .

³²⁸ Pano twayai tukunyike mitwe yetu. Kabiji vulukai kupwila kwa bufuku buno, pano; kabiji ke bufuku bwa Kijilo. Kabiji anweba bonse vulukai kyokyo, anweba, muji Benakilishitu, twimwita anweba kwiya na kuja Kijilo pamo ne atweba. Tubena kuketela kwikala na kimye kyawama bingi.

³²⁹ Kafunga wetu wawama, papo, Mulongo Neville, kabiji . . . Baanga batemwa Mulongo Neville? Ambai mba, “Amena.” [Kipwilo kyaamba mba, “Amena.”—Waku.] Telekai, balongo, telekai kwi amiwa nobe wenu . . . nobe umo wenu wa bakafunga ba mu ino tabbanako: Lamachilai kwi Mulongo Neville. Ikalai nanji. Mwamona? Aye ye kalume wakwa Kilishitu. Ikalai nanji. Aye Baibolo waamba mba, “Twayai tupwile pamo: kukijishamo byo mubena kumona jije juba jibi kasa jifwenya pepi.” Iyai ku mpwijilo, iyai; twayai tutwele mukachi ne kwikala ku lubaji lwa kafunga wetu. Mwamona? Ikalai bulongo na . . . 

62-1104M Mazhina Amwenga
Branham Tabernacle
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org